

國

朝

列

卿

紀

國朝列卿紀卷之七十一

國初都察院左右都御史年表

詹

徽

南直隸婺源人薦舉洪武十七年任左歷太子少保吏部尚書

湯友恭

南直隸鳳陽人人才洪武十七年任右

凌

漢

河南原武人秀才洪武二十一年任右

楊克明

河南靈寶人洪武中舉明經二十四年任左

袁

泰

山西萬全人進士洪武二十四年任右

張廷蘭

湖廣澧州人進士洪武二十五年任左

解

敏

河南陽武人進士洪武二十六年任右

曹

銘

陝西會寧人進士洪武二十七年任左

吳斌

洪武二十八年任左

南直隸霍丘人貢士

暴昭

武二十八年任左

山西浮山人薦舉洪

王平

武二十八年任右

四川新繁人人才洪

楊靖

洪武二十九年任右

南直隸山陽人進士

嚴震直

十年任右陞工部尚書

浙江烏程人人才洪武三

景清

華除元年任左

陝西真寧人榜眼

陳瑛

才永樂元年任左

南直隸滁州人

吳中

年任右歷少師工部尚書

山東武城人國子生永樂二

陳德文

永樂八年任右十二年卒

廣東保昌人洪武舉文學

劉觀

永樂十三年任左

北直隸雄縣人進士

王

彰

河南鄭州人舉人

永樂十八年任右

國初都察院左右都御史行實

詹徽字資善直隸徽州府婺源縣人吏部尚書同之子徽有才智見事敏決十三年以薦舉擢監察御史十六年陞都察院左僉都御史本院自十四年改御史臺爲都察院正七品衙門革中丞等官止設察院御史至是陞正三品設左右僉都御史徽首膺簡命性嚴厲不以色假人善持風紀 上嘉之特賜徽與

禮部侍郎朱同左通政蔡瑄等十二人襲衣十七年正月陞都察院正二品定設左右都御史并左右副僉都御史及經歷都事十三道御史專糾劾百司辯冤枉提督各道一應不法事務特陞徽爲左都御史徽持憲類矜苛刻諸司凜凜不敢犯十八

年六月吏部尚書趙瑁伏誅命徽兼吏部尚書十九年七月

上以徽任職公勤詔有司復其家二十五年加太子少保支兼俸

二十六年二月涼國公藍玉以謀反下獄上集羣臣廷鞫未

服徽叱令具實玉因奏徽爲黨與侍郎傅友文伏誅詳國初吏

部

湯友恭字

直隸鳳陽府懷遠縣人洪武中舉人才歷官

十八年陞右都御史佐理院事二十一年以事

免

凌漢字斗南河南開封府原武縣人洪武十七年以舉秀才至

京獻烏鵲論上喜之擢司經局正字未幾出知會稽以事逮

繫浙江按察司獄久不決會按察使陶晟在京上知漢無罪
獄爲晟所淹命械晟還釋漢與俱來旣至拜監察御史巡按陝
西秦陝西民病數事且言古人謂丈夫出疆有可以安國家利
社稷者專之可也臣竊以爲在春秋戰國則可在今大明一統
之時則不可苟許其專恣故大臣擅權之漸上善其言召其
子賜鈔二百錠衣一襲二十一年又以不受私遺陞右副都御
史時詹徽爲左都御史論議數不合每面折徽徽銜之奏遣按
事蘇松還朝以失職爲監察御史桂滿所劾左遷刑部侍郎二
十四年命署吏部數月改禮部右侍郎又數月上以漢年老
令歸鄉里漢叩頭曰臣願生居京都死葬京土上許之命居

於私第二十五年起爲左副都御史九月改左贊善二十六年
四月復拜右僉都御史尋劾致仕還河南陞辭 上問先賜歸
不行今歸何也漢對曰先時詹徽在臣有後憂今徽伏誅臣無
憂故敢歸爾漢頗有政事才然出言不檢時人亦以此少之

楊克明字

河南河南府靈寶縣人洪武中舉明經歷

二十三年陞通政使二十四年陞都察院左

都御史本年免

袁泰字

山西平陽府萬全人洪武辛亥進士授湖廣鄱縣

訓導陞鉛山縣丞清慎愛民邑賴以安又崇文術興學校後改
丞羅山益著政聲十八年正月陞試都察院右僉都御史十九

年陞左僉都御史二十三年陞左副都御史秦爲人才辯明於法律有能名然頗深刻嘗鞫經歷王爵受賄更罪人姓名燬煉成獄爵誣服爵屬吏薛希勝詣大理寺辯訴改讞於河南道考驗爵實無弊秦欲掩已過嗾河南道復寘之法事聞上命廷臣會鞫之事果寃於是御史夏長文等劾秦苛刻而欺併其家違法事罪當死上責秦曰國家治天下者法而持法平者御史也今若此欲人無寃得乎秦叩頭免冠泣謝上以老宥之二十四年陞右都御史尋掌院事奉命同六部翰林院叅看歷代禮制更定衣冠服室器用制度二十五年正月秦奏監察御史胡昌齡等四十一人緘口不言時政王惟名等四人闖

葺不稱職當罪之。帝曰言非難言而當理爲難。昌齡輩安知其終不言乎。若闕葺不稱職者罷之。泰復執奏曰昌齡等非不能言但心懷譎詐不肯言耳。帝曰人臣進言於君必有關於國之利病民之休戚亦豈得輕易若遽以心懷譎詐罪之何異於張湯腹誹之法於是泰不敢復言。本年以憂去卒於家。一統志稱泰處心廉慎執法不移理枉伸冤祛除民害但或人謂泰構陷張景以後恣肆凌橫諸御史莫敢糾其非惟解縉起草力詆其奸亦可知其槩云。

張廷蘭字

湖廣岳州府澧州人。洪武乙丑進士授審刑司

詳議十九年。革審刑司。陞大理寺左少卿。二十一年陞大理寺

卿二十二年陞本寺正三品衙門二十四年陞通政使二十五
年陞左都御史掌院事二十七年免

解敏字

河南開封府陽武縣人洪武乙丑進士性剛勁篤

學明敏以古人自期授監察御史以才識卓著權江西按察使
在任旌善懲惡不少假借貪墨畏懾改行易善聲稱赫然二十
六年超拜都察院右都御史克持風紀臺中肅然二十一年以
事免

曹銘字

陝西鞏昌府會寧縣人洪武乙丑進士授兵科給

事中才名顯著二十一年陞大理寺右寺丞二十五年陞大理
寺右少卿上眷遇甚隆二十六年正月父喪賜鈔五千錠命

馳驛歸葬畢事起復益殊恩也二十七年還京特拜左副都御史尋進左都御史掌院事爲人爽直不持小節繩人二十八年九月以罪誅

吳斌字

直隸鳳陽府霍丘縣人洪武中由縣庠貢入太學

二十一年擢刑部主事持法不撓太祖重之二十八年特陞左都御史掌院事本年以事免

暴昭字

山西平陽府浮山縣人由薦舉洪武中授北平布

政司叅政二十八年擢左都御史掌院事次年改刑部尚書死靖難詳國初刑部

王平字

四川成都府新繁縣人洪武中由人才薦舉擢監

察御史二十一年陞河南按察司僉事廉介明敏爲政有聲行部至孟津宜陽屬吏斂財以賂平械其人并所賂以聞 太祖

嘉其得憲體 賜文綺襲衣鈔錠仍降璽書勞勉之二十七年

陞都察院左僉都御史二十八年陞右都御史二十九年致仕
楊靖字仲寧直隸淮安府山陽縣人洪武乙丑進士改庶吉士
試事戶科有才幹本年擢試戶部左侍郎十九年實授二十二
年陞戶部尚書二十三年 上命榜諭各處稅課司局巡攔令
計所辦額課日逐巡辦收於司局按季交與官攢出給印信收
票不許官攢侵欺致令巡攔部納違者重罪其各處稅課司局
巡攔商稅俱三十八分稅一不得多收本年五月改刑部尚書

賜誥曰於戲昔聖人以德化天下人民樂從者衆違者寡天下治矣然聖人之心必欲使天下之人皆爲善而無惡共樂天下之樂有不然者故有張刑制具以齊之旣而法行則賞當其功罰當其罪民日遷善而去惡於是上下相安和氣充溢天地清寧可謂咸亨於乎相繼之君臣罔知大道務十惡而傷大德特簡刑以治之法縱民玩故奸者得以恣肆良者含冤而受暴雖欲善不可得矣以斯君臣之心非不仁蓋慮淺而見薄亦欲天下治耳不期爲世之大病也此鄭子產有政猶水火之喻而焚溺之戒可謂周於人情而熟於事理者也故治國者必擇仁人以治刑蓋非仁人執法國務之繁由此而生朕甚憫之爾資善

大夫楊靖僉曰可今特授爾爲刑部尚書爾其敬慎體道惟明
克允六月 上命靖同都察院於囚徒內審有丁糧者每二名
着買馬一匹杖囚一名充水夫一名十名造船一隻常川走遞
其用車夫處流囚四名共辦車一輛正身病故戶丁補役不在
消乏之例十二月 上諭靖曰自今爲犯十惡并殺人者論死
餘皆令輸粟於邊以自贖力不及者或二人或三人併力輸運
仍令還家備粟以行翰林院學士劉三吾等曰聖心仁恕重念
及此罪囚受更生之恩矣 上曰愚民犯法如嗜飲食嗜之而
不知止設法以防其犯而犯者益多推恕以行吾仁而人或可
以濟三吾曰三代而上刑罰常簡本仁恕也三代而下刑罰常

濫以嚴刻也

上曰善爲國者惟以生道樹德不以刑殺立威

二十五年正月諭靖等曰在京獄囚卿等三覆奏朕親審決猶

恐未當在外獄囚繁多居官者安得人人盡職所擬者豈能一

二當罪自今在外所上獄囚卿等當加詳讞務得真情然後遣

官審決有寃者卽爲伸理毋致良善被誣姦邪僥倖惟雲南道

遠若候遣官必致淹滯其令本處會官詳審決之八月靖奏都

督經歷唐奉先以事請託通政使葉獄於法當杖 上以奉先

進士命紀其過二十六年正月命兼太子賓客并給兼官之俸

命兼署禮部事秋七月 上命凡有罪囚許刑部令主事廳會

監察御史五軍斷事司大理寺五城兵馬指揮打斷後又令

衣衛亦得與焉二十八年坐事除名會時征龍州以其地界安南先命禮部尚書任亨泰監察御史嚴震直諭之尋遣靖等往其國徵糧數萬石以供邊儲日焜皆遵奉不敢違二十九年以功起左都御史掌院事靖資性明敏有識善敷奏理刑平恕上數獎勵之至三十年七月有鄉人坐事繫獄家人擊登聞鼓靖爲改狀草增飾浮詞爲御史所劾上念其才不之問御史論不已乃賜死於家

嚴震直字子敏浙江烏程縣人洪武二十一年十一月以督賦太祖高皇帝素聞其名二十三年庚午服闋來朝卽擢布政司叅議之職不任之於外留中署通政司事是年夏六月奏對詳明

四方文牘遞遣無稽留冤抑之赴愬者上請旁達咸無滯情冬
十月改授戶部江西司郎中二十五年陞工部右侍郎二十六
年六月轉拜本部尚書時 朝廷營建方殷乃稽古驗今綜理
縝密而常有不備之慮九月里人有告訐其從弟子姪不法事
上命震直自理無所徇獄具 上以震直不欺盡宥遣之凡三十
餘人二十七年正月命震直行文書教天下多栽桑棗造冊回
奏違者全家發金齒充軍冬十二月降授北平道監察御史而
蘇州府係焉益釐正百度平反冤滯不吐不茹和平得人凡諸
赴逮者剖決無稽留惟恐獄之不虛也二十八年秋八月廣西
龍州趙宗壽襲其叔知州任不俟 朝命自雄長其地 朝廷

患之用羣臣議但興師問罪龍州遣使往諭安南一觀其嚮震
直挺然奉 命撫諭國王陪臣皆俯伏聽命合境大悅刑部尚
書楊靖既除名以庶人巾幘使其國徵糧五萬石爲龍州軍餉
乃及其未至宣言楊某久爲秋官威名素著其君臣氣已懾楊
至而糧卽集賴先聲之力耳廣東西鹽運爲官民病上奏減其
半二十九年奉 命復至廣西立法接運以通行鹽州郡商民
至今便之其河渠之不利舟行者併屬焉桂林興安靈渠屯久
圯歷朝興修不底於成比至召縣屬審地勢鳩工用計浚源疏
流因其故道延袤五十餘里導南江曰漓自蒼梧入於海北江
曰湘由洞庭轉長江築堤岸治陡閘修石渠以便行者通石函

以利灌溉旁通靈川千秋峽鏃象鼻石峰焚鑿江灘礙舟之石
自是往來無虞工不重舉可貽永久桂林梧州興安諸文學掾
咸備紀述謂秦史祿漢馬援千載之後興復無善繼者至震直
當爲三人云歸奏 太祖喜甚謂戶曹盧侍郎迥等曰廣西塘
陡昔久不成今老嚴成此巨功朕授任得人矣居廣且幾年每
督有司均徭定賦整風振俗貪婪者咸爲斂跡而錄囚尤稱不
濫久旱得雨人以爲決獄無冤所致士民共歌之獠民嘯聚依
險阻者又草檄招撫屢年逋逃皆趨事有司邊徼以寧里中惡
少年與其父皆冒法辭連震直長子宗仁及壻莫瀾刑曹推理
事未白長子瘐死 太祖爲罪治獄官特誅惡少年父子而釋

其壻三十年丁丑陞都察院右都御史嘗謂天下之蹈法者之不可止而獄庭乃民之死地也風紀之原刑法之重尤盡其心臨事獲昭雪者居多兩淮民買食鹽先輸米於官而鹽久不及民米過期不納通額積至屢年御史分理鹽課唯問來期及責官吏曠徵之罪赴逮京師者數百人以上奏其故皆釋之石灰山關卒二十餘人誣服劫盜罪當誅震直以推讞不實亦皆奏免廣西護衛千戶張甲嬖所寵誣其妻兄弟及外母厭蠱罪他御史按之獄且成賴言而事白廣西都指揮同知姜旺有告訐之者監察御史國用承命往按之震直廉知其誣卽奏免問是年左都楊靖同任都察院太祖以前御史屢更而尤委任之

忠言讜論多所聽從每謂其南人北貌厚福未艾顧語左右屢
與嘉歎秋七月監察御史李斌賊事覺問罪不及其全家 太
祖怒治故出官吏罪初不及震直以身居憲端及委罪所屬再
三叩頭請乃降官監察御史八月復拜工部尚書詳國初工部
景清本姓耿報籍訛爲景字



陝西慶陽府真寧縣人倜儻

尚大節領鄉薦游國學時同舍有秘書請求焉生弗許固請約
且卽見還生日子縱敏一夕能盡熟之邪不得已與之旦往索
其書清曰吾不知何書初未嘗假汝也忿訟於祭酒清卽持所
假書往見曰此清燈下所業書耳卽背誦徹卷及問生生無以
對祭酒叱生退清以書還生日吾以子秘太甚特以相戲耳

初清赴舉過淳化主家有女爲妖所憑清宿其家是夜妖不來
清去卽復來女詰之曰避景秀才耳及旦女聞其父父卽追及
清道所以清書景清在此數字令父歸粘女所 妖而是遂滅
洪武甲戌清試禮部中第三錄詩書二經對大庭 賜第二人
及第入翰林爲編修三載改監察御史丁丑春 召見嘉其材
能 命署都察院左僉都御史革除間陞左都御史會改都察
院爲御史府改御史大夫 成聖渡江至金川門百官皆出迎
拜於江次清至立罵不已 上責之曰且不說爲主卽爲親王
若敢爾其罪云何清奮然曰汝乃反賊何親王之有復罵不已
乃 命左右挾其舌且挾且罵填之近前若有所啓則含血直

沁 上衣乃命臨之罪及九族久之 上晝寢夢清入繞殿追
之清猶能爲厲 上乃命籍其鄉轉相攀絡者數百人謂之瓜
蔓抄其村至今無人焉

或云 成廟繼統方孝孺練子寧等同日死之而清獨委蛇侍
人疑之一日清早朝着緋衣入先是星者奏文星犯 帝座甚
急 上備之意固疑清及朝清獨緋衣遂收之而得所帶劔因
加詰責不屈而死死之後精英迭見嗚呼豫讓爲主報警清豈
其倫歟

陳瑛字

直隸滁州人少穎悟有才識洪武中以人才貢入

太學未幾擢監察御史三十八年陞山東按察使革除元年調

北平按察使坐遺藩邸謫廣右安置壬午年成祖入正大統

召爲都察院左副都御史署院事爲人殘忍刻薄十一月瑛言

皇上順天應人以有天下四方萬姓莫不率服然車駕初至京

師有不順命而效死於建文者如禮部侍郎黃觀太常寺少卿

廖昇翰林院修撰王叔英衡府紀善周是修浙按察使王良沛

縣知縣顏伯偉等計其存心與叛逆同宜追戮之上曰朕初

舉義兵誅奸臣不過齊黃數輩耳後來二十九人中如張統王

鏡鄭賜黃福尹昌隆皆宥而用之今汝所言數人况有不與二

十九人之數者彼食其祿自盡其心悉無問蓋上初入京城

昇及是修自經死觀時在安慶投江死叔英守廣德自經死良

在官闔家自焚先是上兵至沛縣伯偉不肯下與其子俱死

後瑛闖方孝孺等獄詞遂簿錄觀叔英家妻女皆將給配觀妻

出通濟門先擗其女於河遂自溺叔英二女皆就錦衣衛獄俱

赴井死人皆傷之永樂元年陞左都御史掌院事八月瑛劾歷

城侯盛庸口出怨誹心懷異圖請寘重典以儆餘衆言之再三

上命削其爵九月上諭瑛等曰朝廷置風憲爲國家耳目糾察

百寮綱維庶政比來有司奸弊生民疾苦豈無可言而因循玩

愒略無建明爾其申明憲章在內令監察御史在外令按察司

各舉其職庶副朕之委任不能舉職者有罰十年輔皇太子

監國四月丁憂監生夏宗奏訐縣吏時貴違法害民皇太子

命瑛委御史同按察司究治仍令宗復監待罪十九年 上定
鼎北京儘三殿災詔求直言言者多云建都北京不便主事蕭
儀言之尤峻 上怒誅之時科道亦多云不當輕去金陵 上
曰方選都吾與大臣密議數月而行言者因劾大臣 上命言
者與大臣俱跪午門前對辯瑛言科道皆白面書生不知大計
上命左右至午門問衆皆啐罵言官戶書夏原吉獨奏曰御史給
事職當言路且應詔陳言臣等備員大臣不能協贊大議臣等
之罪也 上悅宥之瑛尤其責初義原吉日不然 天威嚴
重言輩歷事久言雖失 上憐之若言官得罪所損不小衆始
歎服原吉之大度而詆瑛之刻薄未幾以苛得罪

吳中字司正山東武城縣人洪武戊寅自國子生授營州後屯衛經歷陞大寧都司經歷成祖師至大寧中以衆出迎命守

會州教士卒力田南兵攻城率衆卻之移守薊州命署北平布政司理問尋陞本司經歷給饌運贖城守並効勞績成祖入

正大統改元永樂以功陞大理寺丞是歲旱蝗具言此由刑濫所致皆臣等之過乞戒飭法司務寬平無幾陞少卿以發奸慝

陞都察院右都御史五年將營北京宮殿改工部尚書詳工部陳德文一名瑩中字文石廣東南雄府保昌縣人洪武中舉文

學授台州府通判越二年左遷枝江今又遷縉雲監稅所至有稱以兵部尚書唐鐸薦拜北平道監察御史明年擢按察使三

十年使西蕃撒馬兒罕等國開通西域居十有二年克舉

不辱君命永樂五年回京凡所歷之國采訪風俗作爲詩歌歸

日進呈 成祖嘉之擢僉都御史今內閣修西域志多按其言

八年二月隨駕征迤北十月迤北平 上念久勞王事進右都

御史賜衣十襲名馬二匹及漢尉四名充伴還鄉省墓九年六

月復 詔回京十二年三月卒於位進左都御史階 諭賜葬

祭

劉觀字

直隸保定府雄縣人洪武乙丑進士授大谷縣丞

有治才以薦舉擢監察御史三十年陞署都察院左僉都御史
革除二年調嘉興知府尊禮賢士修學政興利去害郡中肅然

尋丁父憂永樂元年起復擢雲南按察使未行拜戶部右侍郎
二年調都察院左副都御史時左都陳瑛尚刻右都吳中尚寬
觀善處二人各無阻忤四年肇建北京宮殿諸役並興命採木
浙江既至飭有司率吏民歷谿谷絕險之地凡材之美者悉取
之輸北六年陞禮部尚書尋以典章故實非其所諳改刑部尚
書七年車駕北狩命扈行八年涼州羌寇起督將出征羌寇
遠遁九年回部十三年改都察院左都御史理院事十五年命
提督漕河浚壅淤以便糧艘令行禁止而漕行不滯尋回院管
事十九年定鼎北京命巡撫陝西地方考察官吏安輯軍民事
竣還院值左都御史陳瑛以劾去位特命掌院事詳都察院

王彰字文明河南開封府鄭州人洪武丁卯領河南鄉薦明年
會試禮部弗利補太學生嘗使山東平糶以實軍儲同列納賄
縱逆負者彰毅然責之弗聽比還其人果得罪彰遂以廉幹聞
明年擢吏科給事中歷左右給事中進都給事中未幾改刑部
福建司員外郎拜山西布政使司左叅政居七年吏弗忍欺民
懷其惠永樂五年超拜禮部右侍郎階嘉議大夫與尚書鄭公
賜同德協恭奉職惟謹明年以父喪去九年服除遷戶部歲庚
子陞右都御史秩資善大夫十九年定鼎北京命撫河南事竣
掌院事詳都察院

國朝列卿紀卷之七十一終

國朝列卿紀卷之七十二

都察院左右都御史總論

夫都御史者卽秦御史大夫之任也自漢列御史

太尉爲三公號爲重任至唐制大夫一入正三品非復漢大夫

之任然觀韋思謙爲御史大夫不屈王公且曰耳目官固當特

立鵬鸚鵡豈衆禽之偶崔隱甫爲大夫督責侍御史稍有忤

竟列其罪前後貶黜者過半是大夫禮峻百僚自古而已然矣

國初設御史大夫與丞相都督爲三府至洪武十七年定爲左右

都御史提督諸道糾劾官邪辨明冤枉始次九卿之列求其克

持風裁振肅紀綱者若顧太康考黜不肖而宿弊爲之清革王

忠肅杜禁私謁而苞苴爲之屏絕耿文清結主以廉力糾曹石
之橫馬端肅殉國以身廷抗雜劇之非戴恭簡檢身率下尤謹
考察述職之典張簡肅奉公秉直獨嚴貪酷奔競之禁是皆山
峙嶽立爲近世特出卽古名執法又何加焉其餘寬嚴異用未
免有苛刻圓通之弊然較之劉觀以貪敗陳智以暴免戴縉以
佞進李士實以逆誅則又不可一律科矣宋人有言必得鐵石
肝腸鷹鷂操行者然後可以任是責不然則軟熟依違緘默退
縮而曾中耿耿者不立何以砥礪乎百僚又云御史府尊則天
子尊嗚呼紀綱之地顧可處非其據耶

國朝列卿紀卷之七十二

都察院左右都御史年表 凡並設協管者不註掌院事

劉

觀

直隸雄縣人進士永樂十三年任左掌院事十九年改北京加太子少保宣德三年下獄免

王

彰

河南鄭州人鄉舉永樂十八年任右宣德二年卒

向

寶

江西進賢人進士永樂二十二年任右兼詹事洪熙元年調南院

顧

佐

河南太康人進士宣德三年任右掌院事八年以疾致仕

熊

槩

江西豐城人父喪從母嫁吉水胡氏因冒其姓永樂辛卯進士宣德八年召任右都御史掌院事九年兼任刑部事

本年卒

於官

陳

智

湖廣咸寧人進士正統元年任右掌院事五年劾免

王

文

直隸東鹿人進士正統七年任右掌院事十年鎮陝西

陳

鎰

直隸吳縣人進士正統九年任右十年掌院事十四年左加太子太保景泰四年致仕贈少保諡僖敏

楊

善

順天大興人永樂中生員正統十四年任左都御史使北虜後封興濟伯卒諡忠敏

王

文

詳前正統十四年任左景泰三年入閣歷少保謹身殿大學士卒贈太保諡毅愍

俞士悅

直隸長洲人進士正統十四年任右都御史協王文陳鑑掌院事

李

實

四川合州人進士景泰元年任右本年出撫湖廣

王

翱

直隸鹽山人進士景泰三年任左本年出總兩廣歷太子太保吏部尚書卒贈太保諡忠肅

蕭維禎

江西廬陵人進士景泰三年任左四年掌院事加太子少保天順元年調南院歷南兵尚書諡文昭

羅

通

江西吉水人進士景泰三年任右加太子少保天順元年丁憂

耿九疇

河南盧氏人進士天順元年任右掌院事本年降江西布政歷南京刑部尚書卒諡清惠

馬

昂

直隸滄州人鄉舉天順元年任左掌院事二年遷兵部尚書加太子少保改戶部卒贈少保諡恭襄

寇

深

直隸唐縣人監生天順二年任左掌院事五年死曹賊贈少保諡莊愍

李

賓

順天順義人進士天順五年任右掌院事八年陞南兵尚書

李

秉

山東曹州人進士天順八年任左掌院事成化三年陞吏部尚書

林

聰

福建寧德人進士成化三年任右掌院事七年撫大同歷太子少保刑部尚書卒

項

忠

浙江嘉善人進士成化四年任右七年督荆襄軍務進左十年遷刑書改兵部加太子太保謚襄毅

李

賓

詳前成化五年任左掌院事加太子少保十三年致仕卒贈太子太保謚襄敏

董

方

順天廓縣人進士成化九年任右本年撫大同歷刑部尚書

王

越

直隸濬縣人進士成化十年任左十三年加太子太保兼兵部掌院事十六年封威寧伯

戴

縉

廣東南海人進士成化十七年任右掌院事十九年陞南京工部尚書

李

裕

江西豐城人進士成化十九年任右掌院事二十年調南院歷吏部尚書

朱

英

湖廣桂陽人進士成化二十年任右掌院事加太子少保二十一年卒贈太子太保諡恭簡

屠

瀟

浙江鄞縣人進士成化二十一年調南院

劉

敷

江西永新人進士成化二十二年致仕

馬文升

河南鉅州人進士弘治元年左掌院事二年遷兵部尚書改吏部加少師卒贈太師諡端肅

屠

瀟

詳前弘治二年再右掌院事四年養病

白

昂

直隸武進人進士弘治四年右掌院事六年陞刑部尚書加太子太傅卒贈太保諡康敏

屠

瀟

詳前弘治六年再右七年左掌院事九年陞吏部尚書加太子太傅致仕

閔

珪

浙江烏程人進士弘治九年左掌院事十二年遷刑部尚書加少保卒贈太保諡莊懿

侶

鍾

山東鄆城人進士弘治十一年

戴

珊

江西浮梁人進士弘治十三年左掌院事十八年卒贈太子太保諡恭簡

王宗彝

直隸東鹿人進士弘治十三年
右十五年陞南京禮部尚書

史琳

浙江餘姚人進士弘治十三年
右十五年陞院事正德元年卒贈太子太保

張敷華

江西安福人進士弘治十八年
左掌院事正德元年致仕卒贈太子少保謚簡肅

屠勳

浙江平湖人進士弘治十八年
右正德二年陞刑部尚書加太子太保卒贈太子太保謚康僖

劉宇

河南鈞州人進士正德二年
左掌院事本年遷兵書歷少保文淵閣大學士

屠庸

詳前正德二年起太子太傅吏部尚書兼
左都掌院事四年致仕卒贈太子太保謚襄惠

張憲

江西德興人進士正德三年
右四年調南院歷南京禮工二部尚書

陳金

湖廣應城人進士正德四年
年左掌院事本年丁憂

洪鍾

浙江錢塘人進士正德四年
以刑書兼左掌院事五年出督四川軍務加太子太保卒謚襄惠

李士實

江西豐城人進士正德六年
右掌院事本年致仕附逆濠伏誅

林俊

福建莆田人進士正德六年右未任歷工刑二部尚書加太子太保

馬中錫

直隸故城人進士正德六年左本年以失誤軍情下獄卒

王鼎

福建福州衛人進士正德六年右掌院事七年致仕卒贈工部尚書

陸完

直隸長洲人進士正德七年左掌院事加太子太保八年遷兵部歷吏部尚書

石玠

直隸藁城人進士正德八年右掌院事十年陞戶部尚書

彭澤

陝西蘭州衛人進士正德十年左掌院事加太子太保掌院事十二年致仕歷少保兵部尚書

王璟

山東沂州人進士正德十年右十二年左掌院事加太子太保十六年致仕卒贈少保謚恭靖

張綸

直隸宣城人進士正德十二年右十六年掌院事本年致仕卒贈太子少保

陳金

詳前正德十二年以少保兼左都同王璟掌院事十六年致仕

金獻民

四川綿州人進士正德十六年左掌院事嘉靖二年遷刑部歷兵部尚書

俞諫 浙江桐廬人進士嘉靖二年右掌院事三年致仕卒贈太子太保謚莊栗

邊憲 直隸任丘人進士嘉靖三年由南刑書改左未任卒

李鉞 河南祥符人進士嘉靖三年右掌院事四年陞兵部尚書

顏頤壽 湖廣巴陵人進士嘉靖四年左掌院事五年遷刑部尚書

聶賢 四川長壽人弘治庚戌進士嘉靖五年左掌院事六年以大獄免歷刑部尚書

胡世寧 浙江仁和人進士嘉靖六年左掌院事本年遷刑部歷太子太保兵部尚書卒贈少保謚端敏

李承勛 湖廣嘉魚人進士嘉靖六年以兵部兼左都掌院事加太子太保八年改兵部卒贈少保謚康惠

伍文定 湖廣松滋人弘治己未進士嘉靖六年右七年出征陞兵部尚書

王憲 山東東平人進士嘉靖八年左掌院事本年閑任歷太子太保兵部尚書

熊浹 江西南昌人正德甲戌進士嘉靖八年右掌院事本年閑住歷吏部尚書

汪 鉉

直隸婺源人弘治壬戌進士嘉靖九年右掌院事加太子太保兼兵部尚書督團營十一年陞吏書卒謚榮和

王廷相

河南儀封人弘治壬戌進士嘉靖十一年左掌院事十三年加兵書兼右督團營進太子太保二十年爲民

毛伯溫

江西吉水人正德戊辰進士嘉靖十五年右十六年遷工部尚書

周 叙

詳工部尚書湖廣九溪衛籍息縣人嘉靖十五年任右都總督宣大軍務

王堯封

直隸定興人弘治乙丑進士嘉靖十六年右十七年遷戶部總儲歷南京兵部尚書

毛伯溫

詳前嘉靖十七年以兵部尚書兼右協理院事十八年行邊本年還十九年出撫安南

周期雍

江西寧州人正德戊辰進士嘉靖十八年右本年遷刑部尚書

毛伯溫

詳前嘉靖二十年以太子太保兵書兼右掌院事二十一年遷兵部尚書

熊 浹

詳前嘉靖二十一年以兵書兼右掌院事二十三年陞吏部尚書加太子太保

周 用

直隸吳江人弘治壬戌進士嘉靖二十三年左掌院事二十五年陞吏部尚書加太子少保

宋景

江西奉新人弘治乙丑進士嘉靖二十五年左掌院事二十六年卒

王以旂

應天江寧人正德辛未進士嘉靖二十六年左掌院事本年遷兵部尚書改三邊總督加太子太保

屠僑

浙江鄞縣人正德辛未進士嘉靖二十六年左掌院事加至太子太保三十四年卒謚簡肅

周延

江西吉水人嘉靖癸未進士三十四年左加太子少保四十年卒於官贈太子太保謚簡肅

歐陽進

江西安福人正德丁丑進士嘉靖四十年任左

潘恩

直隸上海人嘉靖癸未進士四十年以刑部尚書改左都御史四十一年致仕

張永明

浙江烏程人嘉靖乙未進士歷刑部尚書四十一年改左都御史四十五年致仕

王廷

四川南充人嘉靖壬辰進士歷南京禮部尚書四十五年改左都御史隆慶四年致仕

趙貞吉

四川內江人嘉靖乙未進士隆慶四年以文淵閣大學士掌院事本年致仕

曹邦輔

山東定陶人隆慶四年以左都提督五軍營陞南戶尚書

劉燾

直隸天津衛人嘉靖戊戌進士隆慶四年以左都提督神樞營未任

陳其學

山東登州衛人隆慶四年以右都提督神機管陞南刑尚書

崑守禮

山東德平人嘉靖己丑進士隆慶四年任萬曆三年致仕

陳瓚

直隸獻縣人嘉靖丁未進士萬曆三年任六年致仕

陳玠

江西臨川人嘉靖辛丑進士萬曆六年任十一年致仕

趙錦

浙江餘姚人嘉靖甲辰進士萬曆十一年任十四年丁憂

辛自修

河南商城人嘉靖丙辰進士萬曆十四年任十五年致仕

吳時來

浙江僊居人嘉靖癸丑進士萬曆十五年任十八年卒

李世達

陝西涇陽人嘉靖丙辰進士萬曆十八年由刑部尚書轉左

孫丕陽

陝西富平人嘉靖丙辰進士萬曆二十二年由刑部尚書轉左

都察院左右都御史行實

劉觀字

直隸保定府雄縣人洪武乙丑進士授大谷縣丞

有治才以薦舉擢監察御史三十年陞署都察院左僉都御史
革除二年調嘉興知府尊禮賢士修學政興利去害郡中肅然
尋丁父憂永樂元年起復擢雲南按察使未行拜戶部右侍郎
二年調都察院左副都御史時左都陳瑛尚刻右都吳中尚寬
觀善處二人各無阻忤四年肇建北京宮殿諸役並興命採木
浙江既平徭有司率吏民歷谿谷險絕之地凡材之美者悉取
之輸北六年陞禮部尚書尋以典章故實非其所諳改刑部尚
書七年車駕北狩命扈行八年涼州羌寇起督將出征羌寇

遠道九年回部十三年改都察院左都御史理院事十五年命提督漕河浚壅淤以便糧艘令行禁止而漕行不滯尋回院管事十九年定鼎北京命巡撫陝西地方考察官吏安輯軍民事竣還院值左都御史陳瑛以苛刻去位特掌院事二十二年

仁廟嗣位命兼太子賓客本年加太子少保 上自臨御以來大

理少卿戈謙數言事 上厭其繁瑣觀與尚書呂震吳中侍郎

吳廷用等交奏其賣直沽名以是清議少之又 本朝初不禁

官妓惟挾娼飲宿者有律耳至宣德初許臣僚宴樂以奢相尚

歌妓滿前觀簋盞不飾善以智籠人私納賄賂紀綱爲之不振

御史亦貪縱無忌三年六月中一日早朝罷 上召大學士楊

士奇楊榮至文華門諭曰吾二人商量一事京師端本澄源之地祖宗時朝臣無貪者年來貪濁之風滿朝何也士奇對曰貪風永樂之末已作但至今甚耳上問永樂何如對曰十五年以後太宗有疾多不出扈從之臣放肆無顧藉請託賄賂公行此事已徹九重俱未舉發仁宗嘗謂臣言初到北京上問兩京臣僚有能守廉者否對曰無敢不守上曰扈從來此者賂賂競行其能守廉惟吏部侍郎師達一人汝當知之榮曰是時賊貪方賓最甚上問今日之貪誰最甚者榮對曰莫甚劉觀士奇曰風憲所以警肅百僚憲長如此則不肖御史皆效之不肖御史差出四方則不肖有司皆效之上撫掌歎曰除

惡務本又問廷臣中今誰可使掌憲兩人久未對 上曰未必都無一人士奇對曰通政使顧佐廉公有威曾任御史及按察司皆有風采榮曰佐亦嘗爲京尹能防禁下吏政清弊革 上喜曰顧佐乃能如此命賜茶而退數日有旨令觀巡閱河道觀既去數日陞顧佐右都御史賜 璽書令考黜不肖洗滌積弊佐奏黜其屬官不肖者二十餘人罪甚者發遼東於是御史張循理等連章劾奏觀貪賊狼籍并奏其子輻脇制諸道騁私滅公皆明著實跡 上大怒逮觀父子皆至出御史章示之既承伏法司坐觀重法以輻同犯免科具奏次年四月 上召榮及士奇以奏示之且曰觀負 朝廷處重非過士奇對曰觀誠有

罪但經事 四朝數任顯仕願姑屈法全其生榮亦乞貸之

上曰爲汝二人曲貸其死發爲邊吏曰辱之過甚與死等耳 上

曰欲父子皆貸乎曰子發戍邊而令觀隨居恩與法兩盡矣遂
命法司發遼東天下聳然改觀至七年楊士奇言田里小民之
不安皆由於有司之貪污暴虐請令風憲官考察奏罷 上曰
然向使不罷劉觀風憲亦未得清爾此言是蓋深燭其奸云

王彰字文明河南開封府鄭州人幼穎悟好學稍長有司選爲
州學生益自刻苦學日進洪武丁卯領河南鄉薦明年會試禮
部弗利補太學生嘗使山東平糴以實軍儲同列納賄縱逋負
者彰毅然責之弗聽比還其人果得罪彰遂以廉幹聞明年擢

吏科給事典封駁之任夙夜在公出納惟允歷左右給事中益慎益虔聲譽尤著遂進都給事中未幾改刑部福建司員外郎時有豪橫往往構訟根株連結至數歲不能斷決有司率爲所誣害彰曰法貴平恕然亦豈宜寬縱以長惡哉於是正之以法而爲所誣者皆得釋人咸悅服旣而超拜山西布政使司左叅政居藩七年吏弗忍欺民懷其惠永樂五年召拜禮部右侍郎階嘉議大夫時四方萬國奉玉帛重譯以朝覲賓貢者肩背相望於京師賞賚燕享無虐日與尚書鄭公賜同德協恭奉職惟謹明年以父喪去官九年服除遷戶部嘗祀華嶽過陝州之新安聞民鬻男女償逋租旣還奏之詔悉蠲其租且官給楮

幣以贖其所鬻男女人皆德之十年壬辰改都察院右副都御史論事嚴毅持法公正人不敢干以私嘗以母夫人年高歸省侍而難於請適蒙恩命按河南許其過家且賜母夫人冠服仍給白金楮幣以歸爲壽時人莫不欣羨歲庚子陞右都御史秩資善大夫十九年定鼎北京命撫河南待諸鄉舊一如平生至於公法雖親不貸時諸郡連歲水患民多流亡而有司復加重歛民益以困悉奏之於是詔停不急之徵十餘事凡官吏以貪暴罷免者九百餘人招流民復業者幾五萬家發官廩以賑之賴全活者甚衆先是強賊張大聚亡命嗾賊山行劫商賈爲之不通女僧宋繼善與其徒數十人爲妖言惑衆妖人李人美以

左道惑人悉捕斬之三十年命督劄北疆事職權荒平生嫉惡甚然獄有所疑者必反復訊鞫然後決有鄭旺者罪當辟彰閱其辭疑命御史爲辯之果得不死性至孝以父早世事母夫人尤謹在京師所得四方珍味必遣人馳獻然後敢食歲時薦先竟日悲哀不樂所得俸祿必分族人及濟貧乏嚴於家法訓飭子弟其有違禮度者必痛責之俟其悔悟乃已宣德三年卒於官彰爲人簡靜待人以誠率下以正平居言若不出口至臨事論辯詞氣侃侃弗少置自爲侍從之職薦躋顯要歷事累朝屢介自將恪勤夙夜垂四十年亦無玷於官箴云

守溪長語云王彰河南人永樂中爲右都御史奉命往諭周

府令以三護衛爲獻。王從之。馳驛以聞。上喜，彰乃出示曰：「護衛三日不徙者處斬，不數日而散。於是嚴以令，下嘗爲微行。有司有貪酷者治以極刑，人情震懼，歸省其母，其母爲具坐中。以本州知州爲託，彰曰：『公法不可私也。』頃有丐者至，母以饌與之。明日至府，御史以飯獻彰，卽丐者也。彰曰：『吾訪事亦當如此。』其母自是遂臥疾，不復言，亦不復食。三日從者以告彰，性至孝，馳往跪問，母終不言，亦不食。彰知之，曰：『得非以知州之故乎？』當聞於上，爲母赦之。其母始言飲食若初。

向寶字克忠，江西南昌府進賢縣人。洪武乙丑進士，授庫部員外郎。累官應天府尹。戊寅坐事，謫蒼梧。成祖正位，復前職。已

丑逮獄庚寅謫兩淮判官未幾復訟繫南京乙未宥復前職永樂二十二年仁宗皇帝卽位欲擢用之適交趾缺按察使部首以寶爲奏上未許遂擢都察院左僉都御史翌日入謝陞右都御史階資善大夫未幾命兼詹事府詹事特賜楮幣羊酒寶鈔雖屢見挫抑而志於有爲到官不數日卽條陳八事以進其一曰錄用勲舊二曰設置諫官三曰選舉賢才四曰簡練將帥五曰責重有司六曰考覈吏員七曰監生資格八曰疏通鈔法其言皆懇切有裨於時政者上命次第行之宣宗皇帝卽位之初以南京都察院缺人特命往焉餘詳南京都察院顧佐字

河南開封府太康縣人洪武庚辰進士除莊浪知

縣在邑廉平士民頌德值午節會射將官以文士易之乃連發
三中且進止有禮無不驚服永樂四年以材望入爲監察御史
守正嫉邪不激不隨人稱爲真御史十年遷江西按察副使游
事勤敏威望尊號令嚴奸黠聞風遁跡聲名大振十四年召爲
應天府尹剛稜不撓吏民畏服勲豪貴戚爲之斂手政聲赫赫
議者謂類包孝肅之知開封洪熙元年出爲貴州按察使未行
改通政使宣德初臣僚習尚宴樂以奢相競歌妓滿前紀綱爲
之不振宣德三年六月中早朝罷召大學士楊榮楊士奇問廷
臣中誰可使掌憲兩人久未對 上曰未必都無一人士奇對
曰通政使顧佐廉公有威曾任御史及按察司皆有風采榮曰

佐亦嘗爲京尹能防禁下吏政清弊革。上喜曰願佐乃能如此。陞右都御史賜。聖書令考黜不肖洗滌積弊佐奏黜其貪淫御史并朝士不肖者二十餘人又禁用歌妓糾正百僚朝綱大振天下想聞其丰采藩臬郡邑無不興起下至吏卒悚慙懍然四年更有遭笞者招佐之過謂受皂隸賂放歸悉具姓名以聞。上密以示楊士奇且曰爾不舉佐廉乎對曰所訴之事誠有非誣蓋今朝臣月俸止給米一石薪炭馬芻咸資於皂不得遣半歸使備所用皂亦皆樂得歸耕實官皂兩便此京師大小臣僚皆然臣亦然自永樂以來如此。仁宗皇帝固知之所以增朝臣之俸。上歎曰朝臣之艱如此因怒訴者曰。朝廷

用一好人輒爲小人所排欲下法司治之士奇對曰此未事不足上干 聖怒但付佐自治恩與法並行矣 上召佐以吏訴狀授之諭之曰放皂隸耕使給薪芻京官皆然爲之不足爲過小人不樂檢束誣陷正人汝自治之佐叩首退召吏示之狀吏恐甚佐曰 上命我治汝我姑容汝但改行爲善竟不治之上聞之喜曰佐得大體矣數月有囚告佐累枉人重罪不聽訴理者 上大怒召楊榮士奇諭曰此有重囚教之排佐小人陷正人不可不究治遂命三法司鞠之實千戶臧清殺一家無罪三人當死代寫狀教之誣告 上曰不誅之佐何以行事立命磔清於是佐正色立朝元勛貴戚俱憚之陝西布政周景奸賊無

度佐切齒欲除之累置之法以上累釋之不能申其激濁之意後又阻之者數次正統初以風疾乞歸復優禮而去實用事者忌而陰排之後疾愈不復起居家十餘年卒居其位者皆莫及也議者稱爲臺臣第一云

水東日記云顧都御史佐性嚴重聲望偉然未嘗口毀譽人且晚東朝房小憇前呵雙藤立戶外官僚行道以此爲驗往往有輓驢駐馬折而還者雖公遭時得君之盛要亦有懼伏彈壓之實焉

又云午門東直房六部都察院堂上官候朝之所兩門入惟都察院正官獨處一小夾室近歲都御史顧公佐非公事未嘗與

諸司羣坐立此其一耳蓋亦得宋制殿廡幕次惟中丞獨設椅
子坐殿門後稍西北向之遺意也

熊槩字元節江西南昌府豐城人永樂六年戊子舉於鄉九年
辛卯登進士拜監察御史聽決精敏若老於吏事者卽以能稱
時成祖駕幸北京仁宗以太子監國事槩侍朝立文華殿
門下於大衆中見其狀貌壯偉問侍臣誰何知者以槩姓名對
十六年藩憲大臣員缺成祖命吏部簡兩京朝臣有材望者
補之槩擢廣西按察使仁宗宴於禮部予道里費至則慨然
以戢吏姦恤民隱爲已任屬谿峒蠻獠大出殺掠居民聲搖諸
郡桂人大恐布政使議欲請於藩王出兵以遏之槩曰吾等受

方面之寄寇至無計捍禦乃以煩藩王事聞誰任其咎寇必不至戒嚴而已既而果然議者服其識有居官而沒於其土者家以道遠弗能還 朝廷詔所在給舟車歸之有司迫促甚至槩念男女生聚有年一旦遣行貨用凋落奏乞聽其便從之十八年調廣東二十二年 仁宗正位召至而官車宴駕 宣宗親政以常鎮蘇松浙東西諸郡豪右之民往往挾詐力持吏短長脅制州縣肆毒善良無厭細民苦之特改大理寺卿 命偕中貴人往按之槩亦知 上用已之意偏歷其地凡官吏之無狀民之尤無良爲巨蠹者籍其家盡械以歸於京寘諸法聲振動於一時海鹽民史慶真自號平康聚無賴之徒恣行剽掠有司

累歲莫能禁閉。樂至盡室。遠遁得之。武昌抵以歿。死於是。奸宄帖息。單弱之民舉安其業。父老動色稱快。三尺童穉皆知其名。而相與傳頌之所。至以餘力新學官。勸勵諸生。先賢若胡安定。公范文正。公魏了翁。三陸祠宇之傾圮者。葺之。范氏義田及墳地。爲人侵奪者。歸之。其子孫有賢行者。禮之。士類增重。又奏應天府上元江寧差役頻繁。令國子監缺膳夫。請如洪武中事例。以應天常鎮蘇松府縣罪囚。應笞杖徒流者。充役爲便。上曰。役有罪以蘇民力。亦何不可。命行在刑部議之。但用法過刻。奸民有不便者。誣以受賂在勢者。以私怨欲誣之。騰口言於朝。上疑未之信。遣御史廉問。毫髮近似無所得。還乃直其所。

爲用是上益信之賜 璽書獎勵柔亦自信不疑於利害當
興除者皆列以聞松江嘉興兩郡接壤處其間地大民衆征調
服役公私病之奏析其地爲五縣如其請四年入朝聞勞有加
特陞都察院右都御史往治南京院事始槩之出也鬚髮如點
漆比還浩然盡白人皆歎其賢勞及斯命下又謂宦居是職槩
材長於從政務持大體疑獄滯詞能立得其情而志存平反每
具獄推見至隱惟恐吏售其奸民有不得其平故凡被其理者
人以無冤尤嚴束羣屬恒與古人剛方有志節者嘗之辭氣俱
厲人人畏威奉法憲剛用振明年 賜誥命進階資善大夫未
幾丁內艱八年北京右都御史顧公佐以病久在告召至領其

事在上前知無不言於繫囚枉抑者多所申雪故事車駕
巡幸以文武重臣留守槩兩被是命九年兼署刑部事自朝慮
囚日宴未暇食忽風眩尋卒於官壽五十槩爲人身長六尺神
色明秀望之屹然可畏久而知其坦然無城府與人交恩意備
至居家孝親友兄弟庭內無間言在官不以仕優而廢學有聞
輒手記經史論說古今聽者忘倦爲詩文豪偉健麗似其爲人
尤善草書四方有求之者雖祁寒盛暑忻然應之所著有芝山
公餘二稿藏於家

陳智字

湖廣武昌府咸寧縣人永樂丙戌進士十六年戊子
擢北京道監察御史性剛公直不可干以私歷巡京畿福建地

方御下嚴刻而所守無議十六年秩滿陞陝西按察使益峭厲
骯髒不下人宣德元年陞江西右布政久之轉左正統元年吏
部尚書郭璉薦陞都察院右都御史掌院事在臺中性褊急愈
躁暴有相知者以寬緩爲勸卽置一木簡書戒暴怒三字於上
署諸左右以自警及至有忤觸者輒舉木簡撻之一日與掌順
天府事工部侍郎李庸在朝議事不合相忿詬持拳擊之怒
性旣消悔之莫及五年以災異被御史張最劾免尋卒於家
陳鎰字有戒蘇州吳縣人性寬恕凝重端確不羣美髯而偉容
人見之知爲公輔器永樂壬辰第進士擢四川道御史十八年
陞湖廣按察司副使丁母憂服闋除山東副使未行卽丁父憂

宣德八年服闋待次更授浙江差往魯家務運木十年乙卯

朝廷方以關中控制西北邊方爲國重地陞鎰右副都御史偕都

督同知鄭銘鎮陝西 英宗皇帝卽位賜白金 誥命正統二

年 詔鎰兼提督寧夏延綏等處邊備 勅命事竣還 朝

廷以爲關中不可無鎰也復 命往陝西鎮守如故六年命僉

都王翱代鎰還不踰年復 命往且聽便宜行事九年陞右都

御史以延寧甘肅邊陲虜壤將士已久習於宴閒而邊事日以

廢弛 詔鎰與靖遠伯王璘等整理延寧甘肅總兵守備軍務

俟有條理還鎮陝西歲乙丑 英宗念鎰久勞於外又 命右

都王文代還之鎰自爲右副都御史至爲右都御史十餘年間

雖兩被命徵還隨以陝人奏保留鎰故不得久在朝用事卽
久率無一載之多至是詔益視印管院事篤意用鎰不遣矣
歲已巳大駕親率六軍問罪胡虜特益與王悅及中使阮卷
等爲留守點視城池旣英廟北狩郟王監國鎰同尚書于
謙等彈奏奸豎土振傾危宗社歷數其罪千萬言讀旣畢

王諭以自有處置謙等言振罪惡滔天今日不正典刑滅其族
臣等皆死於此不但已也因慟哭聲徹中外王起入內使將
闔門衆擁謙等隨入太監金英傳令旨且退衆奮欲捽英英懼
言籍沒振遣指揮馬順往衆曰奸臣黨也宜遣都御史陳鎰英
脫身入順前勸解辭色稍遽給事中王竑捽順首衆爭毆之蹴

踏槍裂項刻而斃或就脫順韉擊出眼血流門闕前眾愈怒求
內使毛玉等二人英使捧出亦擊殺之曳三屍陳於東安門軍
士猶爭擊不已鎰等奉令旨籍振宅并其黨彭得清內使陳宦
等家執振姪錦衣衛指揮王山至反接跪於廷共唾罵之令
旨獎諭百官各歸泣事拜謝而出明日移王坐入奉天門左
受朝振宅在官城內外凡數處重堂邃閣藏於宸居器服綺麗
尚方不逮玉盤徑尺者十面珊瑚樹高六七尺金銀十餘廐馬
數百匹鬻山於市其族屬無少長皆斬十月虜寇畿邑遠近作
匿羣小不逞乘亂顛越弗靖詔鎰為左都御史差往通州河
間至臨清一帶撫軍民及安插口外之來避寇者景泰改元

之明年進階爲資德大夫正治上卿陝西旱甚民饑多流移所
司官軍餘丁計一萬四千三十八名上疏奏保復來賑濟陝人
願得鎰如水火監司官以下驟聞朝廷不欲重違陝人之欲
而又鄭重遣鑑於是慰諭勦出居一年至爲賑貸撫恤全活甚
衆還朝有玉帶白金綺服羊酒之賜陞太子太保兼左都御
史管院事進榮祿大夫鑑自爲御史在官恪恭略於細故風裁
儼然在陝西撫安鎮稟紀律之下惠澤加焉輸時糧儲選練將
士修繕城池營築臺堡與凡水利屯種咸在處度日不暇給曲
盡其道人咸便之雖當北虜燕詐渝盟竊發鑑常先事爲備不
失機宜又於延綏等處相其險隘奏置靖虜衛添設河橋巡檢

司於神木府谷二縣各設守禦千戶及於定寧塞靖邊馬營迤西甘肅寧夏極邊等處立塞堡墩臺一千餘所至今賴之又秦延綏安德地方相接東抵山西德州北通東勝察罕腦兒西接寧夏板兒沙漠迤冬黃河結凍無阻以致達賊擾邊乞命武臣總戎文武叅贊雖當時未行至正統末年設之後王驥整理延寧甘肅軍務稱鑑在彼年久深知彼情尤爲委重一應安邊滅賊之策悉聽便宜虞置鑑亦悉心所事凡其設施悉稱上旨鑑意氣仁厚而語若不能出諸口立法嚴而加以寬大故人樂從之教化旁達而政務無不舉陝西數經亢旱鑑殫力竭誠拯救備至秦免宿逋數十百萬人賴不瘁及所全活甚衆咸呼爲

黑髯慈父爲立生祠故至則驩迎慶忻去則攀挽歌思鎰之得
於關陝者如此在都察院凡所設施務爲經國深遠之計政尚
體要當時一切苛急之習皆取而去之其所陳於上者要皆二
帝三王之道粹然仁義之辭最後詔安撫畿甸有云卿爲憲臣
之首故特委以重務所謂鎮國家撫百姓是也 朝廷方倚鎰
永爲毗輔屬鎰疾作堅乞致仕雖得請 上尤念鎰不已賜賚
有加且命遣醫給驛以歸居三年而卒壽六十八贈太子諡僖
敏

府學勸呈云公鎮守陝西時德被生民者久有瞽者百餘輩以
不得覩公之顏爲恨一日羅拜車下咸以手曳其裾拂其髯公

笑而慰之乃去至今秦人稱爲盛事

又云公召還京師總握臺印陝西有旱魃爲虐歲餘不雨上命公復鎮勅曰朕以爾爲腹心故此重託且有昔之韓范今之朕卿之褒公卽日懷香上道大雨隨車傾注歲因以豐流亡來歸民困得甦至今陝人奉治世更生福神位像廟食而家祝焉又云陝西土厚掘井數仞未得及泉每出師軍士苦渴公相其地之可穴而出水者令有司鑿之深不盈尺而舊井宛然有司反命於公公令汲去舊泉而以新泉飲之庶可無病未受命者飲之皆病陝人仰之如神明焉

又云工部尚書周文襄公正統間巡撫南畿時欲以郡治之西

北空閑倉基以廣公宅公不受人問之曰子不聞唐中書令張嘉貞拜相不立田園以自汙子何受文襄公重之

又云公致政家居時常出里門有陶人偶汚公衣公回易衣顏色如故其人驚謝公曰誤也何以謝爲

又云公學博才贍於書無所不讀下至醫藥陰陽星曆之書亦皆精通其義區畫政務之暇手不停披口不絕吟所集有玉機微義刊於陝西有介菴稿藏於家

顧昌云宣德正統間大臣入秉鈞衡出撫方岳利益上下而名實益隆者三人焉兵部尚書錢瑋于謙工部尚書盧陵周忱其一則公也于性剛果當擾攘之秋力排羣議奮不顧身以還巨

寇以安 社稷者公殆弗克其巡蒞於外而頌聲洋溢則視于
爲優周性詳密會計錢穀纖髮具備隨時歛散移東賑西雖甚
凶荒而民無饑色上無缺賦者公殆弗及其視周事近要以自
固通豪右以資助則一於直道而心無所歉焉于之受戮固非
其罪周之被劾則有其由公始終無咎正寢以及歿而保身之策
又獨爲優矣爰卽古人方之于靖難趙宋之宗澤也周之理
財李唐之劉晏也而公則我朝之師德矣

王文直隸保定府東鹿縣人永樂辛丑進士詳內閣

俞士悅字仕朝直隸蘇州府長洲縣人永樂乙未進士擢監察
御史歷官大理寺卿正統十四年己巳之變 英宗北狩 景

帝嗣位陞都察院右都御史協陳鑑理院事留守京師協都督
衛穎帥師六萬守德勝安定二門甲冑未嘗去體事平陞刑部
尚書詳刑部

李實字 四川重慶府合州人正統壬戌進士歷禮科都給

事中十四年 英宗北狩 郕王卽位累進諫言景泰元年六

月二十六日戊戌北虜遣使請和 文華殿文武大臣懇

請差人往虜中議和奉迎 太上皇未允卽命太監興安傳

旨要於大臣中務選如富弼文天祥者遣之禮部以三品以上官

具名封進 上命興安召實問其鄉貫傳 旨曰恁累進章

朝廷素知忠節 上欲遣使虜中如何實曰某雖才識不同適

朝廷多事之秋安敢辭諒亦不辱君命與安忻然入內復命有

旨陞實兵部右侍郎做正使羅綺陞大理寺右少卿做副使及二

十八日進本討馬匹等物欽改禮部右侍郎七月初一日行十

一日至也先所營失八禿兒之地也先曰兵端皆因通事陳友

等小人締構以致小事成大及我送 太上還京令遣大臣來

議又殺所遣使臣張關保等我回北後遣使者盈不花等亦不

生還其故何也實答曰太師雖名送 駕兵行不戢攻闕掠野

朝廷豈信張關保等死於陣者盈不花未至京皆因將士不以爲

來和而以爲戰故也也先曰喜寧是 朝廷內臣我遣來何爲

亦見殺實等答曰喜寧蒙 太上厚恩却乃導引太師兵馬殺

之宜矣也先曰太上在此我令伯顏帖木兒早晚恭敬未嘗失禮因以酪酒飲食實等十二日遣人引實等至伯顏帖木兒管見太上實等拜泣問起居太上曰朕非以畋遊而出實爲生靈除害然陷於此皆王振所致也及也先實意送朕回又被喜寧屢次阻住但唆令進兵今王振喜寧皆死矣因問上聖太后與上安好又問舊臣數人又曰在此踰年始見卿等曾將衣服靴帽等來否實等曰虜中屢有人回皆不知車駕何在朝廷遣使亦無回報以此臣等行時諸物未帶時御用物惟金龍綉枕在實等因自出所有金器燒酒燂肉等爲獻欲盡取所齋米來獻太上曰小事勿勞卿也爲朕通和乃大事爾

實等因極言王振曩昔擅國之罪。太上曰振未敗時無人肯言。然朕亦不能燭奸悔復。何及語將畢。伯顏帖木兒至。太上賜酒共飲。伯顏帖木兒復邀實等至其帳。與飲。實等回至。太上帳求留宿。館伴者不肯。實等乃至也。先管宿十三日也。先置酒以飲實等也。先曰爾等念。太上否實等曰。君父蒙塵。臣子豈不念乎也。先曰爾等卽念。何不迎回實等道來迎之意也。先意將從之。伯顏帖木兒言禮物未備。不可容易也。先乃止。凡實等所與也。先及伯顏帖木兒語者。其妻皆並坐。聞其議。傳酒相酌也。先伯顏帖木兒貂裘帽。其妻珠琲覆面。垂肩盞酪。孟肉粗塊。長啜亦更互吹彈舞。以爲樂。十四日也。先遣其右丞地禿同

實進貂鼠皮馬匹遣其尚書土兒罕同羅綺往大同調回虜兵不復擾邊實辭 太上就出書三通以交實其一奉 上聖皇

后其一達於 上其一以諭羣臣伯顏帖木兒約實等速來成

和好且指也先幼子曰此與 朝廷議媾者實不敢對十九日

實至懷來過右都御史楊善侍郎趙榮同可汗普化所遣使皮

兒馬黑麻北去蓋瓦剌國政皆也先專之其兵最多普化雖爲

可汗兵稍少知院阿剌兵又少君臣鼎建而立外親內忌其合

兵南侵利多歸也先而弊則均受及欲和也先恥屈意而陰使

普化阿剌來言實等卽至京緣邊虜兵卽退久之 英宗回鑾

實以功陞都察院右都御史尋出撫湖廣地方天順元年 英

宗復辟首言實在虜無君臣禮遂罷其官詳湖廣巡撫

王翺字九臯直隸河間府鹽山縣人永樂乙未進士擢監察御史累官提督遼東軍務左都御史景泰三年召還院協王文理院事時廣西土官黃瑤殺嫡當死以易儲爲請下廷臣議左都王文力主如請翺口雖不言心知其不可惟嗟惋歎息而已尋加太子太保本年值兩廣不靖命總督軍務歷吏部尚書爲時名臣詳吏部

蕭維禎名兆江西吉安府廬陵縣人宣德庚戌進士授刑部主事累官大理寺卿景泰三年陞都察院左都御史協陳鎰理院事與易儲加太子少保四年陳鎰致仕專掌院事維禎久任法

官老於斷案而心術陰險善炫風跡大學士陳循屢欲薦引入閣不果景泰八年春正月 上染疾十一日維禎率十三道同百官於 左順門外太監興安自內出問答曰乃都御史五府六部堂上官 聖體不安謹來問安太監興安以指作十字謂病之篤不過十日耳鄙曰若皆 朝廷大臣耳目不能爲社稷計日日徒問安耳衆退維禎集十三道議曰 儲皇立無他患矣請早立之維禎喜曰斯議得矣衆還道中作封事草其略曰 聖躬不寧內外憂懼京民震恐蓋謂 儲皇未立以致如此伏望 皇上早建元良以正人心維禎錄於會稿次日早具稿於 朝集文武羣臣石亨張輓張軌于謙王文胡濙楊善等

於左掖門議允僉題維禎舉筆曰我更一字乃更建字爲擇字
笑曰吾輩亦欲更也是日本進奏十有三日奉聖旨朕這
幾日偶患寒疾是以不曾視朝待正月十七日朝請擇元良一
節難准報院達道皆勃勃有憂慮御史楊瑄與同官監察御史
錢進樊英同日斯當復請適禮部尚書胡濙令一辦事官赴道
報曰講立東官事今本部約閣下及文武大小羣臣於十七日
待上視朝合辭懇請令來報知僉名瑄與瑄英忻忻約曰若
上再不可若等皆免冠叩頭辭職乞還田里滿朝若是上亦動
心無乃不可乎會議於禮部學士商輅主筆草奏其大略曰天
下者太祖太宗之天下傳之於宣宗陛下宣宗之子見

深宣宗之孫以祖父之天下傳之於孫此萬古不易之常法
十五自登正本令僉姓氏至十六日晡時方完是日先進題知
本本具門閉衆曰不先題知明日對仗進呈亦無害也是日徐
有貞時常往返石亨家莫知其故未暮有貞自造亨家燃燭移
時方出十七日四鼓時衆集於朝謹待上出頃之南城呼噪
震地羣臣失色須臾鳴鐘鼓上皇御極矣於是朝野騰懼以
爲復見太平本遂不進旨下擒于謙王文等以其迎立外藩
故也徐有貞等喉言官給事中王鎮等誣劾王于二少保等迎
立外藩不軌事至謂事雖傳聞情實難容下多官會問于倪首
不辯但言辯也死不辯也死朝廷赦得我衆人亦不肯惟王

文條析折辭衆莫能難繼祗阿附曹吉祥石亨徐有貞等乃謂
事出 朝廷不承亦難免文致獄案擬謀逆重罪凌遲處死陳
循江淵蕭鎡俞士悅項文暉王偉古鏞丁澄等俱知情斬罪奉
旨于謙王文結同內戚王誠舒良張永王勤等構成邪謀逢迎景
泰暴易儲貳依阿從臾廢黜正后內外奸朋紊亂朝政擅專兵
權將軍國大事都壞了近因 景皇御名有疾不能臨朝視政
這廝每自知罪惡深重恐朕不容因共謀爲不軌糾合都督范
廣等要將總兵官等擒殺迎立外藩以樹私恩動搖 社稷其
一般奸臣黨陳循蕭鎡項文暉江淵俞士悅王偉古鏞丁澄商
略亦各密知前謀不行發舉及朕復位這廝每奸謀節次敗露

已將于謙王文王誠舒良張永王勤處以極刑籍沒家產成丁
男子俱發充軍仍將其餘奸黨陳循等發口外永遠充軍役及
原籍爲民了論這廝每圖危 宗社的情理窮兇極惡本當族
滅如今體上天好生之德都從輕處置了今內外的官務要竭
誠盡忠奉公守法以保身家不許似這廝每朋奸亂政違了必
誅不饒恁都察院便出榜曉諭多人知道欽此論者謂于謙等
之冤雖曹石有貞等主之而維禎黨奸誣忠律當反坐未幾
上燭其奸調南京刑部尚書詳南京兵部

羅通字學古江西吉安府吉水縣人永樂壬辰進士擢監察御史
史性剛爽有才略在臺中嶄然自樹二十二年以言事忤旨

出知交趾清化州宣德初年入爲戶部員外郎歷兵部武選司郎中勤於職務諳熟兵法慨然欲以經濟自見正統初年奉

命叅贊甘肅軍務坐累謫廣西容縣開官尋調東莞河泊所官十

四年己巳之變英廟北狩景帝嗣位有以才略薦者召復

兵部職方司郎中守居庸等關及虜酋也先遣使至書辭悖慢

朝廷復書大略言中國已立皇帝天下兵甲衆盛可得抗禦之

意已而廷議陞道右僉都御史景帝而命吏部誤云右副

都御史命提督宣府等處軍務駐劄懷來剿捕北虜十月北

虜入寇自紫荆關外殺指揮韓清都御史孫祥等至京城西北

關外連日抄掠會四方兵漸集虜夜遁從居庸關出通同總兵

楊洪等帥兵擊虜之未去者虜既退京師解嚴同楊洪練兵於東教場景泰元年命鎮守山西等處嘗從北征通設方略自當一軍鼓行而前深入沙漠北虜遠遁二年還京三年陞右都御史協理院事建言各邊奏報聲息多虛訐境外有三達卽稱數千或遇賊殺十餘人卽妄奏邀功宜屯種練兵嚴選總兵將領時遣夜不收出境探賊掩其不備擊之若止堂堂之陣白日行營非惟賊望塵而遁抑且埋伏以俟其勝其否非臣所能必也奏上 詔議行之尋加太子少保天順元年命兼提督團營本年以憂制去位服闋乞休卒於家贈太子太保

耿九疇字禹範河南盧氏縣人永樂甲辰進士擢禮科給事中

累官刑部右侍郎巡撫陝西地方初六部卿佐使外文移不得
徑下按察司以故偃蹇不受約首奏下之 朝廷以九疇兼理
戎務宜居憲職遂轉都察院右副都御史仍鎮其地值聞 朝
廷下有司買羊角以充燈費上疏止之繼以災異下詔求直言
復上疏乞延儒碩以廣聰明公賞罰以別忠佞擇守令以惠黎
庶簡將帥以固邊疆優詔答之天順改元 英廟復位思九疇
可大用顧侍臣曰耿九疇廉正人也卽召爲右都御史士類皆
賀臺憲得人時子裕任給事中上言父子同在要地非宜遂改
裕爲翰林檢討自幸遭過恩圖補報首進五事曰崇廉恥以厲
士風清刑獄以召和氣勸農桑以厚民生節糧賞以簡軍士任

臺憲以振綱紀 上皆喜納之因勅戒風憲乃進御史告曰

朝廷望治於憲職至矣各宜操滌以副任使不然吾不汝貸衆皆
悚息風紀爲之肅清時邊事不寧將臣怠命將率諸道御史劾
之事泄返爲所訴置九疇等於理九疇引咎自當 朝廷祭非
其罪出爲江西右布政使詳南京刑部

馬昂字景高直隸河間府滄州人永樂癸卯舉人宣德中由舉
人授序班累官刑部右侍郎改右副都御史叅贊甘肅軍務致
仕景泰四年兩廣賊發 詔起總督兩廣軍務兼理巡撫進右
都御史至則安撫軍民推誠懷夷合蠻寇鳩聚劫攘大閱民兵
衛士嚴以紀律授方略伺察無敢不力卒殲羣寇六年以功陞

左都御史仍任前職天順元年取回京命致仕入京復留之命巡撫山西大同等處踰月召還掌院事寬裕有體不弛網漏目不如柔吐剛英宗益重之天順二年兵部陳汝言以賄籍改昂爲兵部尚書詳戶部

寇深字文淵直隸保定府唐縣人永樂中爲郡庠生上言時務朝廷奇其人召入胄監時山東要路軍需錢穀有弊政遣中貴人陳保生往廉之求國子生精敏者同事得深其喜宣德初擢刑部主事以勤能稱尋陞員外郎丁父憂服闋復任亦盡心刑獄凡疑獄人不能辯者必屬之正統甲子用執政薦陞山西按察司副使時天久不雨朝廷念刑獄有寬抑者特委錄山西諸

郡大辟因察其情有矜疑者五十餘人悉奏釋之又上邊務數十事多見采納丙寅四川松潘夷不靖守臣請出師剿之朝廷念撫治者非其人乃命廷臣推有風力者僉謂深可即日召至京師都察院右僉都御史以往遂破賊寨擒其渠魁送京師諸番警伏獻盛甲刀劔三千童男三十七人駿馬四百餘匹繼後入貢不絕公暇則撫恤士卒相地要害築關堡城池六十處道路險峻者咸削平之以便儲運番夷酋長或率其黨來見乃宣布朝廷威德且諭以享福之道莫不感化地方底寧朝廷嘉其能進左副都御史加食二品祿綵幣白金之賚甚重一日得母報平安書潸然出涕曰老母在堂久曠定省安能已於

懷卽上章懇乞終養 朝廷優詔慰留之景泰辛未召還特加
獎勞番人乞留者十有七奏不從未踰月提督遼東軍務缺人
廷議復屬遂假以便宜之權賜白金綵幣慰勉以往至遼左威名
大振乃積糧練兵畫防禦守備之計中外守臣咸敬畏之海賊
李福挾妖術以惑山東之民聚萬人深得報略不改容乃親率
數百騎直抵海州遣都指揮周英授以成筭補之遂獲千餘人
詰其造亂之由得首惡者二十餘人械至京師餘皆釋之景泰
甲戌北虜入境會總戎得深所議巡邊之策因其勢便斬首賊
七十餘級獲馬六百餘匹在邊歲久思親益切或與同事者言
及母老輒流涕終日不食累上章乞歸不允丙子得還京議邊

事時母年九十有四已感風疾曰吾得見吾兒卽瞑目矣深悲泣懇求歸省至家母一視而逝哀毀踰禮 朝廷起復任乞終制不允天順改元 英宗復位乃許終制二年臺長缺人復起視事進左都御史深嚴厲伎刻百僚畏憚 上深嘉之寵賚優厚嘗召咨訪政務但呼老寇而不名性至孝雖居顯仕惟以不得養親爲歉諳於世故見本朝舊典歷歷能記聽獄能斷人服其明天順辛巳見逆賊曹欽父子兄弟恣意妄爲卒御史劾之欽等遂行反逆首害之賊誅滅特贈少保謚莊愍

李賓字廷用號敬菴順天府順義縣人正統乙丑登二甲進士九月授浙江道御史丁卯觀風兩浙深得憲體巳巳值邊關有

警四月往大同察看虜情九月虜寇深入奉 勅召募河南懷
慶諸處民壯得壯丁萬餘操練以法軍威遙振虜遂遁去庚午
正月陞太僕寺卿以擾攘之秋所重在馬司其政者必在得人
故有是命賓釐革宿弊馬政爲之修舉癸酉冬陞都察院右副
都御史奉 勅提督永平山海諸處軍務兼總糧儲當時平易
玩之時益致謹武備凡關隘城堡器械車馬無不整飾戒嚴以
時無事乃散兵歸農籍其糧歸官而屯田之利以興兵食兼足
地方以寧天順丁丑 英廟復辟首召爲廷尉三月廷試充讀
卷官逾年楊淑人卒僚佐皆以娶繼室爲勸答曰吾見後世戕
賊骨肉多矣忍見吾兒罹此患耶不聽以各該衙門相浴將竊

盜罪囚有犯一次二次曾經刺字者俱遇赦宥俱免通論以革
後所犯論爲初犯免刺發審具題竊盜律內節開竊盜初犯於
右小臂膊上刺竊盜二字再犯刺左小臂膊上三犯絞以曾經
刺字爲主掏摸罪同若軍人爲盜雖免刺字三犯一體處絞今
法司問他人楊小廝等犯竊盜除革前俱不坐以革後爲初犯
恐非律之正文未見曾否奏准以此論斷有未允當幸遇 聖
朝法律惟謹臣等職係叅駁不敢輕易循襲又况律爲萬世常
規赦係一時恩例又今盜賊多係平昔不務生理之人專一糾
合爲盜及至事發問擬做工往往隨卽在逃仍又爲盜習以爲
常略無忌憚見問者未結而犯之者卽至以致賊盜繁興良善

受害若欲弭盜以安民必須依律而坐罪今後法司所問竊盜
合無照依正統年間刑部等衙門會議奏奉 欽依內事理通
以革前革後准三犯論仍將所犯革前革後明白開奏定奪永
爲遵守又因刑部擬罪太刻具奏用法莫貴於寬平發落莫患
於不一用法寬平則人易信服而法亦可恒法不一則難以奉
行而民亦無所措手足矣如犯人聶斌等包攬磨菇糧米誑騙
脚錢價銀同爲虛費京儲均坑陷納戶其刑部問斷各犯一則
正犯枷號一月處以重刑當房人口仍發邊遠充軍一則止連
當房家小發邊衛充軍似此發落誠爲不一何況此等包攬之
人併前項例所開僞印批填勘合者皆愚昧無知一時貪圖小

利冒犯刑憲別非元惡大愆之比今包攬糧草之人照依都察院欽奉 聖旨榜例連當房家小發邊衛充軍及偽印批填勘合之人自有偽造印信本律真犯斬罪若此論斷已非輕矣而工部所奏榜例却要將正犯枷號一月處以重刑當房人口仍發充軍雖元惡大愆亦不過此稽之經傳有曰罪人不孥罰弗及嗣兼且律令家人共犯有止坐尊長之條婦人犯罪有獨坐夫男之例臣等每見 皇上斷一應罪犯處死者或情可矜疑欽蒙宥死發邊遠充軍止令家小隨住况包攬物件律不該死今法司問擬正犯枷號一月處以重刑當房人口發邊衛充軍則是不分男女長幼不擇祖父子孫皆在遣行名連僉解械

擊窘辱無所不至似此比擬問非所謂法之平也如家准起見
今注司監問包攬戶部糧草及各衙門物料等項之人合無除
已納完止照常例發落及僞印填批勘合犯該真犯罪死者自
依本律問結外若是一應包攬糧草物料等項果係誑騙銀物
入已坑陷納戶虛費京儲者亦免其枷號止照都察院欽奉

聖旨榜例連當房家小發邊衛充軍已卯三月丁母憂上遣官
葬祭卽 詔奪情庚辰三月父病甚弟寶來報卽陳情乞視

上俞允卽日至家父勉以忠君之意一言而逝居喪哀毀盡禮蒙
遣官諭祭乞守制於家辛巳春 特詔起復視事是歲孟秋叛
賊曹欽謀爲不軌躬率家人子弟挺身擊之於長安右門撲滅

火勢爲 英廟所知深蒙眷顧遂有右都御史之擢及總憲度
言聽計從百僚振肅申滿三載受 誥進階資政大夫三月
讀廷試卷八月陞南京兵部尚書叅贊機務受命之初見餓羣
載道首以民食爲急奏於倉廩賑貸賴以全活者甚衆復令有
司各設常平倉俾無流移之患時有鹽徒乘巨艦張旗幟
羅弓矢鼓角數出江上大肆劫掠往來商旅慮之乃嚴督操江
將士捕獲渠魁餘黨悉平叅贊數年奉 勅書二十餘道夙夜
勤勞王事未始怠忽處事公平人心悅服丁亥上章乞歸田
不允進階資德大夫正治上卿己丑以九載考績朝京留掌部
察院事陞左都御史總治憲臺見荆襄流民囿聚嘗建白虞

至今地方賴以無虞癸巳進太子少保仍兼前職雖恩寵屢加愈自祇慄丁酉被言官劾指乞休時年六十有二優游林下者幾十年置別業於鄉山日與故老徜徉詩酒間乙巳春忽沾微疾竟弗起有司以訃聞特命工部營葬事禮部諭祭追贈太子太保謚襄敏

李秉字執中山東兗州府曹州人天順甲申由巡撫宣府右副都御史進左都御史掌院事屬歲當考察秉舉劾無所避公私快焉是歲秋上以大同等處邊備廢弛命秉整飭之適虜寇入境秉率官軍與戰於鳳凰山擒獲人畜萬計無何建州虜酋董山作亂復命秉提督軍務往討平之師還賜一品服

勞以羊酒成化丁亥遂拜吏部尚書詳吏部

林聰字季聰福建福寧府寧德縣人正統己未進士擢刑科給

事中累官左僉都御史天順元年山東饑命賑貸聰詢拔能

官散詣村落給食及醫藥全活數十萬天順二年還陞右副都

御史江淮鹽徒橫行聰往擒其渠魁梟數人餘脇從則用輕典

盜以寧息歸理院事成化二年江淮旱人相食詔聰撫之聰

奏借江南糧及支運糧儲數十萬給民食且與之種三年陞右

都御史掌院事七年巡撫大同宣府號令明肅勸懲有法八年

以疾致政越二年召赴南京都察院視事命兼提督操江十三

年召爲刑部尚書詳刑部

項忠字盡臣浙江嘉興府嘉善縣人正統壬戌進士授刑部主事累官都察院右副都御史巡撫陝西地方天順甲申洮岷生熟番作亂忠調兵撫捕之遂降其衆成化元年虜犯延綏忠與寧遠伯任壽調兵禦之虜道關中水泉斤鹵宋有龍首渠歲久涇廢居民病之忠奏開一渠餘三十里涇陽鄭白渠亦久廢奏募工疏通名曰廣惠渠凡灌田七萬頃人懷其惠立生祠祀之二年虜酋毛里孩入寇命忠提督軍務與彰武伯楊信禦之賊屢捷虜復遁成化三年召還佐院事四年戊子固原土達滿四怨將官劉清生事構其醜類謀叛不三月間聚衆二萬據石城詔以忠總督軍務與都督劉玉討平之擒斬首級七千六

百有奇俘獲二千六百因陳四事爲經久計 上皆從之五年
還京以功陞右都御史仍佐理院事庚寅秋京畿大水民饑

命巡視順天河間永平三府忠發官廩又勸分得米十六萬五千
石銀布牛具各萬餘全活不可勝計是年終荆襄賊李胡子者
本劉千斤餘黨倡流民爲亂復督軍務乃遣人持榜入山招諭
其負險不服者縱兵搜捕凡遣發還鄉者一百四十四萬編戍
者萬餘斬首二十餘級獻俘於 朝者百餘人仍獻便宜十事
詔暫留撫治進左都御史會有星孛於天田言者謂荆襄殺戮所
致忠再疏自列言爲國任怨未嘗妄殺因乞骸骨 上溫詔慰
留且召之還後荆襄三十餘年牙孽不作跡其摧創之力未必

非撫綏之地也十年陞刑部尚書詳兵部

年譜曰充堅子留公牧馬於沙場公胡服挾所牧三良馬乘之
間道走望斗而南越四日夜馬疲乃棄馬潛步忽遇一山崖險
路絕攀援而上至山半饑憊且行且仆倚石歔歔忽見松下有
物塊代遺於路視之乃肉乾公噉肉吸泉復起行若有扶掖之
者遠見胡騎出沒恐爲所獲晝匿夜趨凡七日夜始達宣府會
御史張公昊按宣府開關納之既見仆地移時乃甦視其足有
刺蒺藜百數而公不知也時都御史羅公亨信爲巡撫來視公
令人拔之竟日乃盡不能履臥調上谷兩月餘始能起步

董方字尚矩順天府涿縣人正統乙丑進士授大理寺評事累

官刑部右侍郎成化九年秩滿陞都察院右都御史協理院事
先是宣府大同同一巡撫十年邊方多警以二鎮爲國家門戶
宜各設一巡撫以爲定制命方鎮守大同地方至則飭官吏謹
備禦嚴操練清屯種邊鄙不登十一年陞刑部尚書詳刑部

王越字世昌直隸大名府濬縣人景泰庚午舉京闈辛未登進
士第擢監察御史左都寇深性嚴急獨喜越凡諸道奏牘必令
詳定每遇敷對明暢洪亮英廟目屬之天順庚辰超擢山東
按察使癸未大同有警當道舉可爲巡撫官者上以其人貌
寢意在越徵爲右副都御史以行越力修廢政爲攻守計邊人
賴之成化改元以疾告至京師上命醫視疾遣中官慰問至

再家居久之丁亥 召署院事四年命巡宣大庚寅奉 命出
延綏至崖黨川擒賊四十餘人斬首加百遷左副都御史又於
黃草梁擒賊五人斬首百二十進右都御史壬辰以後往來東
西路及寧夏界前後斬獲者倍之癸巳進左都御史 賜蟒衣
一襲又出延綏韓家塢斬首二百八十餘初虜居沙漠以黃河
爲界水凍而入冰欲解而去遂人止防秋冬春夏以餘力懇田
修城後虜人居河套河套者河之隈也廣袤數千里草卉豐茂
產獸肥美前代及國初累砌城壘置兵戍守後弛防虜遂占居
出沒無時邊坐茲大困越諜知虜它掠遺老弱於廬選精騎萬
餘自出塞齋七日糧盡伏夜行每一舍伏兵數百人使休行四

日天未明至虜帳萬騎齊蹕之縱火且擊且射斬首三百級奪其馬牛羊器械無算數其廬穴焚如無遺比午虜自外趨歸哭聲登於天悉力追軍越結陣徐行殿者與戰及前伏兵起又與戰虜再遇伏知我有備大慟渡河而遜自是邊無患者二十年甲午加太子少保增從一品祿掌院事越抗言將士功大賞輕乞移已官償之不報丁酉加太子太保兵部尚書兼左都御史增正一品祿庚子同太監汪直出大同襲破威寧海擒虜男女百七十人斬首四百級封威寧伯歲祿一千二百石仍兼左都御史辛丑出寧夏擒賊十人斬首百餘廷議文臣伯以上不得進封加太子太傅增歲祿四百石總五軍營兵署前軍都督

府事提督團營未幾出佩將軍印充總兵官赴宣府調度擊賊
十二月命鎮大同十八年移鎮延綏臺臣劾越生事夷狄作
詩怨望尋罷居安陸爲民弘治改元越上疏自列詔許還鄉
甲寅復左都御史致仕丁巳兵部言陝西三邊宜得重臣專任
其事僉舉二人皆弗稱旨以越對乃許之亟召至京引見勞
賚恩禮殊異加太子太保總制甘肅寧夏延綏軍務鎮守巡
撫而下悉聽節制事有未盡便者請易置之乃行至則以虜別
一部居賀蘭山後者數出抄掠帥兵擣之斬首百餘還所掠人畜
器械甚衆上降勅獎諭加少保兼太子太傅越又言哈密爲
土魯番所破久弗繼近番酋吐魯引罪還所侵地宜封其故王

以守之疏上數月未報越慮泄事機焦勞過度遂成疾卒於戊
午十二月一日年七十三上為震悼贈太傅謚襄敏越姿表
奇邁慷慨自許論議英發見事風生雖以文顯久膺帥寄歷西
北諸鎮身經數十餘戰其於邊徼險易虜情真偽將士之強弱
勞逸皆歷歷在胸臆每出奇取捷謀定而後發同事者亦莫測
所嚮至於顛倒才智中自為操縱而人人欣動樂為之用效之
者皆自以不及其所見所執壯老一致雖罹挫劬而志不少衰
善獎拔士類嘗特舉御史四人為尚書屠公瀟佖公鍾楊公守
隨都御史王公濬皆大顯武臣邊將出其門者不可勝計博學
多聞精極吏事判案章奏倉卒立就兵法射藝象緯堪輿之說

固不該究爲歌詩雄邁跌宕若不屑意多不存稿惟詩數十首
板行於時但挾權術附奄豈不免爲世所短云

水東日記云景泰辛未廷試盛預彌封徐侍讀理受卷陳御史
同年叔紹等監試正午忽大風驟起黃塵漲天侍讀曰今日譬
之人家納婦贅婿而變異若此進士中他日其有小人僨事者
乎良久一貢士試卷爲風所颺半空去呼之至乃瀋縣王越也
云文已成尚有稿底在盛謂叔紹當入 奏庶不誤此生三年
叔紹遂執筆至奏尾思而未得盛曰以全盛典侍講曰當矣借
叔紹至兵科書 奏寫本奏監生皆已出不得已盛爲自書之
旣而得 旨禮部再給紙卷是科諸進士試卷皆盛封惟王越

卷獨長成凱卷以病錄正不完不得封二封人皆能識之抑庵
汪先生謂王越策能引漢博士修於家壞於天子之庭語衆以
其能言皆傳觀焉

瑣瑣錄云朝廷用人多取儀表天順間韓都憲雍巡撫大同因
議事至京留補少司馬 英廟諭李文達曰大同巡撫須得似
韓雍人品方稱文達以山東廉使王越對及越至陞見後復諭
文達曰王越是爽利武職打扮越初廷試手中卷子忽被大風
吹起回翔雲漢莫知所止時胡宗伯卽具題知且於內閣取紙
摺成卷于付之後越至封威寧伯蓋飛騰之兆見於廷試體偉
之儀見於進用固不偶然而卒以啓邊釁削爵借大

弁州集曰當越時天下咸貴其才至於今西北邊稱良將無如越者揚一清王瓊方之蔑如也增

戴縉字

廣東廣州府南海縣人成化丙戌進士詳南京工

部

李裕字咨德江西南昌府豐城縣人景泰甲戌進士擢河南道監察御史歷順天府尹成化癸巳陞都察院右副都御史總漕政綱運利弊罷行殆盡數運之後人人稱便張秋南旺湖淮安四湖諸防舊用椿木以捍衝激屢修屢壞費無已裕徵郎中郭昇易之以石利垂永久戊戌丁父憂壬寅服闋至京留理院事癸卯進右都御史掌院事以風紀未振慨然欲嚴東御史臺中

蕭然緣是得謗調南京都察院歷吏部尚書詳吏部

朱英字時傑湖廣郴州桂陽人登正統乙丑進士大司馬鄺楚深加器重曰吾鄉老成凋謝殆盡負重至遠者吾於子有望矣擢監察御史激揚有聲十四年處州賊葉宗留反其黨周明松等四出剽掠朝廷慮其與閩寇合遣英與中官分守要地乃榜諭脅從示以禍福降者甚衆又以計生致明松等數人械於慶元謀報賊首黑面大王領衆三萬來劫明松等中官大懼欲走英不可卽令所司誅明松等尸於市賊聞知遂遁乃募壯勇據院塞遠斥堠民賴以安賊平還京都督汪金以戚畹之貴縱家人奪民田英與諸御史劾之景皇帝責金而歸其用於民

中官姚廣單增怙寵恣橫又率同列劾之皆抵罪會有獻議易
皇儲有詔羣臣入議英與給事中林聰議不可繇是悟執政意俄
有 詔風憲官被告訐者皆外補英上章極論其非執政益忌
之尋遷廣東布政司叅議嶺南寇亂之後閭巷蕭然撫凋瘵招
流亡寬徵歛理冤滯民用蘇息奸民避役者率投司府爲隸卒
主者納其賄而庇之多者百餘人少者亦七八十人英痛革之
懲毀不恤也又立均徭之法等其貲產厚薄以輕重其役吏民
稱便峒蠻爲亂撫之不聽乃進兵剿之其黨棄賊先降者百餘
人大帥欲悉誅之英力持不可誅首惡數人而已 英宗皇帝
旣復辟凡諍易儲者皆得優賞英嘗至京林聰已僉都憲語英

盜自陳吾爲之證英曰向日之言吾職耳豈覲後福耶卒不自
言君子建之都憲葉盛巡撫兩廣其治法征謀與凡興革予奪
之宜多諮於英兩廣合兵剿賊葉屬督察奸弊先是叅將范信
以兵會剿大藤峽信利撈掠馳至廉橫間誣宋泰永平等鄉居
民皆賊黨屠戮殆盡至是又欲并進城等鄉屠之以爲功英爭
其非辜且遣間使請葉亟班師諸民始免屠滅之慘又告廣州
半湖堡民謀亂議者欲遣兵屠之英知其冤又力爭以免湖賊
羅屆寧等寇掠郡縣奉臺檄討之官軍執脅從者欲盡戮之英
曰良民也諭而遣之又別置營以處被掠女婦兵罷訪其家歸
之蓋英屢破劇盜誅止其魁脅從賴以全活者不啻萬人巡撫

上其功遷本司右叅政且 賜綵段寶鏹丁母憂解官歸服闋
改陝西叅政固原熟羌滿四反 朝命都憲項忠帥兵討之項
檄英督饋餉凡用兵方略悉以訪之既賊平其謀畫居多成化
五年陞福建右布政使福建八郡歲輸大青大綠非土所產常
厚價買諸他省吏胥每緣以爲奸青綠一斤至料銀十餘兩英
減其三分之二擇屬官廉能者總收之買以輸官民免科歛提督
市舶中官死鎮守太監分其餘貲遺藩臬力辭不能却乃受而
輸於官八年遷陝西左布政使十年春陞都察院左副都御史
巡撫甘肅首陳安邊十事大槩欲練兵積糧興屯田采諸番皆
切於時務又陳十事如徙居戎簡貢獻謹烽燧防間諜亦常慮

所不及又遷拔編裨授以閫職如王璽劉誠後皆爲名將上
以兩廣久困於兵命總督軍務兼理巡撫兩廣用兵以來戎
帥喜邊功每有小寇輒張大賊勢覬用兵得成其私英深知其
弊下令撫緝猺獞各安生業約飭將士寇來在吾不許輒進兵
諸徭岷有倡亂者購首惡誅之而釋其黨邕州知府岑溥與其
叔思平知州欽內屬久有頭目黃明者益溥祖母而離間其叔
姪劫衆以叛總帥請用兵英曰何事於兵吾將使岑氏送其首
耳乃遣間使密諭欽誅明以雪家門之恥欽感泣遂斬明父子
傳首軍門十六年平鬱林州木頭等峒蠻宅如天河荔浦尋融
間皆巨盜巢穴莫不畏服乞供職貢事聞上賜勅褒諭陞右

都御史食從一品俸交趾侵老撾連歲戰爭衆疑其謀入寇勅
詢處之之宜英奏曰交趾叢爾小國不過與老撾爭地耳遣使
諭之彼當悔悟不可輕用兵 上用其言交人感愧 上表謝
罪且貢方物兵部尚書缺廷臣薦補之 上以兩廣民夷方安
其政不果用居兩廣幾十年 上念久勞於外乃 召入掌臺
事又懇辭 上曰卿才識老成練達有年宜勉副委任乃就職
未幾六載考績 上遣中使賜羊酒寶鏹尋加太子少保會有
星變詔求直言首陳八事多人所不敢言者 上皆納用及有
疾侍郎何喬新適奉 勅賑饑晉陽聞其遣使奏事卽召使至
寢室手書勉何大略謂民饑盜起可憂賢者所當努力無一語

匡章乃躬系 卷之二 一 四三
及私時病已亟字半不成越三日卒君子謂其忠愛之心斃而後已云平生好學政暇手不釋卷所著有澹菴紀年誠菴奏議認真子集凡若干卷

屠瀟字朝宗號丹山浙江寧波府鄞縣人母徐夫人忽一日夢一老人授一大珠吞之遂孕瀟生有異質五歲能記小學孝經諸書七歲徐夫人得疾劇用藥罔效恒跪問疾夫人戲曰須汝肉愈爾瀟卽往割股方破血流父見而驚抱詣夫人瀟泣不已夫人強止之領成化乙酉鄉薦明年丙戌舉進士未幾以疾乞歸五年疾愈之京選試湖廣道監察御史公暇輒關門讀書每至夜分時王襄敏公越掌院事委掌章奏凡所奏多

出其手稿上不塗竄一字嘗語人曰屠某裨吾良多七年奉

勅湖廣盤糧所在必躬詣考覈或有以耗糧坐重典者則曰非侵盜法不應重典悉減論岳州倉官高鎰爲軍士挾私憾受誣瀟廉知其姦親往閱實乃抵罪誣告者武岡大使苟自新恐缺見糧潛落厥經一葉約沒糧二千石旣發其事且曰某必自盡陰使人伺守之其夜果就縊守者捕送瀟反覆其倉實數盈杖釋之歷四十餘所去官吏過半無冤稱者十年巡按四川地方四月歷覽殆徧乃摘其尤弊者十事約禁之民吏歛飭姦宄銷沮後人有刊其榜文爲典刑者十五年用王越薦特陞本院右僉都御史十七年陞左又二年陞右副都御史二十一年陞右都

御史先是李孜省黨嘗以私事銜瀟共媒孽之明年出瀟南京時占城王古來爲安南所侵侮挈國族奔舶廣東訟寃於朝守臣以聞方議遣官而人皆難之時李黨因欲傾瀟薦瀟往命下物議怖恐有私爲謀者曰盍以勅示衆猶可別圖避就毋落其機弄瀟笑卻之卽日飛行比至獻策者或曰安南藩臣也當爲問罪之舉或曰占城脆弱遣回國莫保後艱宜留置之瀟曰用兵則毒民避強則取侮皆弗聽乃詣蒼梧諸郡覘知其情狀移檄安南諭以禍福俾圖逆順安南大恐辭對甚婉瀟曰此所謂不戰而先奪其氣矣可因撫而兩存之遂置安南而召古來諭歸國瀟欲以軍護其歸守臣忌不肯發乃卽召承平人習

武事乘海舶二十艘以往，纖息無動民者。古來感恩以金銀器飾異香，番木若干獻謝。瀟靡卻之，既歸國，復遣使馳謝，并以

聞。上嘉其誠命，受之。瀟辭曰：綏遠之仁，繼絕之義，在聖天子

臣何功之有。上不允，又懇辭，從之。令貯禮部，自是二國輯睦。

弘治改元奉命，總督兩廣軍務，兼理巡撫，以親老乞終養，不

允。留廣未一年，斬獲猺獞數多。賜綵段銀兩，柳州諸處戍軍

舊皆番調，風土殊習，比歲死亡過半，乃爲區處分守，多所全活。

二年，勅還掌院事，明年感疾。詔暫免朝參，又遣中貴人御

醫臨問。賜牲米酒，萊以久疾乞還俸，不許。四年，以疾歸省，途

聞母喪，六年服闋，適南京右都御史缺，員吏部會舉瀟。上特

命回掌院事尋陞左都御史加太子少保時各處災異疊見上
奏曰災異雖出於天感召寔由于乎人必上下交脩則災異可弭
歷疏時弊二十事以上上悉命行之山西寧化王有不孝罪
狀命重臣往覈既實比至京王母改詞瀟方欲具奏原理官
危之曰若聽其反覆吾輩何所逃矣或曰須再問乃奏言王母
前後詞異與民間告子而含忍息詞者例同遂得兩釋九年冢
宰耿文恪公暴卒時會舉四人而瀟名居第三孝廟親書瀟
名付內閣及居銓曹博採輿論廣寄耳目以公考選進退黜陟
無所避有監司以憂去任或云其人宜黜瀟曰古者不伐有德
之國况無顯惡而乘是黜之耶每註選至煙瘴地停筆久之曰

吾嘗經其地官多以瘴死必擇宜其風土者因奏爲著令尤痛抑僥倖或造請者必寘其人於遠地有貴近爲所識求京職官乃語其使曰爾主爲一士孰若爲一大臣耶勲貴有以玉帶獻囑以私者大怒叱遣之弘治六年以後頗多內降官漸冗因災異凡三執奏大意謂天下士事詩書而躬案牘秃銛鋒而竭筋力積數十年不可得而白身之人乃或因奔競乞憐或緣技藝蒙幸如拾芥然不可以爲訓又曰今日之傳奉卽漢所謂西邸之爵唐所謂斜封之官宋所謂內批之降甚爲政體之累陛下當遠祖堯舜近守祖法豈可襲漢唐宋之弊政乎衆皆服其確論言官有欲開納馬之例者卽抗疏曰朝廷倉庫及太

僕見積尚多釋此不用反開是例萬一聞於北虜將謂中國戰馬財用俱已空竭不亦生戎心乎議遂格 清寧宮新成 詔許番僧入宮慶讚肅率大臣再疏止之言甚剴切末復云自今以後僧道之流並乞杜絕齋醮之事並乞停止崇聖賢之正道守 祖宗之家法俾天下後世有所取則皆嘉納之欽天監奏彗星見會九卿條陳十餘事曰早視朝勤聽政汰冗員節財用省差遣處莊田清鹽法申禁例修武備壯國威恤官軍恤邊民停改造惜供應黜異端警驕惰防詐偽皆切時政十年以二品秩滿 上念久勞命中官卽私第賜酒禮越三日加太子太保甫五月卽上疏言臣父已八十有五請預給一品封誥 詔許

之十一年會 武宗出閣加陞太子太傅進階光祿大夫勳柱
國 賜麒麟一品服十三年有疾 上數遣官臨問賜品又遣
御醫診視未幾以疾辭 上賜聖書有知卿老親在堂志將終
養 特賜俯從之語俾給驛還鄉仍命有司給月俸與皂以優
其老歸一年父以壽終十八年 武宗卽位詔進階正一品特
進榮祿大夫正德二年 召以太子太傅吏部尚書兼左都御
史掌院事 賜蟒衣三襲玉帶一束又累 賜龍文詩軸及通
鑑纂要後逆瑾顯權驕僭凡所司擬議事情諷使先帖啓瀟曰
如此豈惟事掣肘抑且無 君矣不從時方嫉言官或欲因事
罪御史瀟曰某寔主之御史稟成而已嘗囑令答御史問有承

順風旨者瀟曰御史風憲之官若笞箠辱之何以振揚風紀糾
正百僚耶終不用其言又大起羅織之獄罪已應律者更欲比
擬滋重瀟曰律已明矣何比擬爲由是大忤瑾奏上輒怒乃摺
拾瀟罪欲脅以從已卒不爲動瑾又以宿憾鉤撻致政兵部尚
書劉大夏罪欲寘之死乃爲委曲救庇卒得減論江西民三戶
造龍船爲歲戲瑾緝知既籍其家猶未愜所擬罪復令會議且
囑論死卒如原擬以復時論甚偉之有御史巡按雲南瑾私人
誣以枉道諸罪乃力爲調護獲免瀟知勢不可阿乞休致不允
適商人入宣府糧者瑾欲誣以盜罪強瀟不從瑾盛怒再奪其
俸遂致仕後三年爲正德壬申卒享年七十有三贈太保謚襄

惠瀟聰穎絕人非角已能詩文比長學益邃雖位至宰輔手不
釋卷尤精法律善折獄初王襄敏公越未見賞識一日命書所
題孔雀圖詩偶虛後王公意不然之徐謂曰汝其題補之頃刻
作長歌進王公讀而笑曰奇至是乎自是深加愛重體貌魁梧
秀整鬚長及臍嘗自稱髯翁平生無戚容愠色推賢讓能尤恐
不及 孝廟方見柄用時三原王端毅公 四朝耆舊乃援王
文端公王忠肅公同時故事力薦之曰聞王某精神強健耳目
聰明燈下猶能讀細書乞 召起與臣同事嘗以御史陳紀學
行兼茂特薦陞按察使後陳卒爲名臣瀟旣加太子太保時馬
端肅公以兵部班例居下謂其前輩齒尊疏讓之給事中魏珪

等因事下獄時值暑月率九卿極論出之周文端公經將謝政
又疏言其剛方有爲陛下不宜苟遂其去及召問執對愈
堅至拂上意不避太常寺與禮部秦不相統屬廷臣會議太
常寺辭不服上命吏部集議乃即其所爭者援據明白且欲
治太常官僚之罪議始定惟不事繳繳之行爲御史時有勸留
草者則曰爲言官言其職耳傳奏草以銜名吾不爲也故終身
未常存稿天性孝友事親備極孝養父好治魚池及守制時將
鑿池以悅其意而未得地一夕夢神人謁曰吾當獻之山覺而
大驚異已而於居之乾隅購得隙地因鑿池得石多且巨又瑰
奇可愛歎曰夢徵矣殆天意乎乃即池山名曰天賜巖構亭於

池前曰樂親亭云嫂董氏孀居無子養餘五十年又上其事旌之悉推祖貲與弟涓姊適王氏者老而寡無子乃迎養數年及歿厚殯之待宗族皆得其歡心與人不設畛域無貴賤戚疏皆以恩雖胥徒臧獲不輕詬詈當在庠時同進忌之者毀之於楊司訓數見斥辱及楊滿去惟滿父子餞於郊後道其地復收恤其子同輩嘗挾長侮滿者及貴顯其人媿乃厚禮之及謁選吏部終無所憾每自謂手持此筆掌刑獄惟恐誤殺一人掌銓衡惟恐誤黜一人其存心如此但議者詆其善結權豎驟致通顯及逆瑾司柄又以冢宰理臺事不免於士夫之口云

劉敷字叔榮江西吉安府永新縣人少孤力學有遠志邑有忠

義山唐相姚元之牛僧孺遺跡存焉宋相劉楚公沆有五百年
來三出相不才何幸繼前賢之句敷每游詠其間輒有企慕之
意景泰元年舉順天鄉試辛未第進士授南京貴州道監察御
史嘗於安慶等處巡江捕盜有錦衣衛官校同差者漁利虐民
卽奏革之采石龍江有劇盜殺掠人設方略捕斬之南京沐駙
馬梅駙馬等府各以奸吏奏許久不決敷片言折之皆服天順
元年陞湖廣按察司僉事湖湘旱饑常澧尤甚巡撫都御史白
公圭委以救荒之策敷悉心區畫活饑民數十萬五年遷貴州
按察司副使成化二年轉湖廣按察使以母喪去位五年服闋
改任福建有盜起海濱敷與憲副何公喬漸定計直指其巢穴

而禽獮之六年遷福建左布政使明年述職於京值彗星見奏
疏十有二條皆切時事八年浙江海潮暴溢漂廬舍溺死人畜
無算憲宗皇帝憂閔元元特陞右副都御史巡撫兩浙乃舉
周禮荒政宜於時者推行之昏墊之民數千家皆不至失所浙
鎮巨璫席勢牟利敷操切之使不得逞奏革其受民詞遂著爲
令十年移撫湖廣兼理軍務以荆襄分封日滋營造民力日屈
奏請定制府第大小會計工價多少給領各府從宜繕修爲便
朝議是之遂通天下爲定例有中貴至常德等府採辦金課乃極
言其弊上爲罷之靖州苗賊作亂勅敷與總兵官李震等會
兵進討攻破大小賊寨六百餘所生擒首從苗賊四百餘人斬

首八十餘級俘獲虜男女一千六百有奇捷奏進左副都御史
先是荆襄流民爲患旣討平之朝廷圖久安之策委與右副
都御史原公傑議處奏設鄖陽府及行都司以統治之荆襄可
久無患十五年以疾致仕歸二十二年起陞右都御史涖院事
具辭上曰卿練達老成特茲起用宜勉就職不允所辭孝
皇卽位復加優禮賜白金文綺至再未幾以人言請老還鄉弘
治五年詔進階散官一級十年卒於家年八十二爲人有才
性度坦夷闊達不詭不激事有窒礙處之綽然雖居倉卒應之
裕如故歷官中外焯有聲績至退處於家作祠堂置祭田合族
義興禮讓其治行多類此

馬文升字負圖河南開封府鈞州人景泰辛未進士擢監察御史歷官南京兵部尚書叅贊機務弘治改元召爲左都御史掌院事正月 陛見召至 文華殿賜大紅金織衣一襲蓋 上在東宮時素知文升故也文升感殊遇益自奮勵知無不言

上特倚重焉二月 上耕籍田文升與行推禮時教坊司以雜戲承應至狎文升厲色曰 新天子當知稼穡艱難豈宜以此瀆亂 宸聰卽斥去二御史以糾儀下獄文升謂 卽位之初不宜輒罪言官於是得釋時論韙之三月 上幸太學釋奠文升與分獻畢列坐聽講 賜茶而退及 上初御經筵 賜賚甚厚乃上言振肅風紀十五事曰選賢能以任風憲曰禁撫拾以

戒臧官曰擇人才以典刑獄曰責成效以革奸弊曰擇守令以固邦本曰恤土人以防後患曰清僧道以杜遊食曰敦懷柔以安四夷曰節費用以蘇民困悉見施行於內節用乞查內府衙門自洪武永樂洪熙宣德正統年間一應供應之物如油蠟猪羊雞鵝及擡柴夫工價銀兩等項某年用若干某年添若干斷自 聖衷量省一分則民受一分之賜就爲定例不許各衙門具奏增添尤望 皇上凡百用度更加撙節俱剴切時弊二年遷兵部尚書改吏部詳吏部

白昂字廷儀直隸常州府武進縣人天順丁丑進士授南京禮科給事中歷官刑部左侍郎弘治三年改戶部治河四年陞右

都御史掌院事凡御史出巡必令詢訪所屬廉汗勤惰才鄙狀以報因以所報真僞爲御史升黜又言方今天下衛所士卒十去有五所司侵牟弊孔百出宜預覈尺籍定數使較然畫一俾清戎御史案籍核考庶絕詰擾欺遜之弊又言天下奏報災荒多不實或以荒爲稔以稔爲荒其弊實多宜令御史覈實天下田數高下之則藏之官旱則蠲高水則蠲低庶其弊可絕咸見納焉六年陞刑部尚書詳刑部

閔珪字朝瑛浙江烏程縣人天順甲申進士擢山東道監察御史歷官右都御史巡撫江西至則舉廉黜貪勸農薄賦且疏盜賊之作皆巨室是由欲逋坐之仍革豪右橫取之弊京宦由是

多不悅會妖人李孜省得幸因言珪不勝任遷廣西按察使弘治初復都御史巡撫畿甸經理儲備修濬城濠尋進刑部侍郎四年以都御史總督兩廣軍務八年進南京刑部尚書尋改左都御史掌院事加太子少保在臺中屢治大獄皆會切情法加以仁恕又因近年比例繁滋吏胥得輕重其手奉 旨同刑部尚書白昂等芟蕪摘要共若干條上之至今遵行十三年陞刑部尚書詳刑部

侶鍾字大器山東兗州府鄆城縣人成化丙戌進士擢浙江道監察御史十五年陞大理寺右寺丞轉左十八年進大理寺右少卿十九年陞右副都御史巡撫保定等府提督紫荊等關二

十一年陞刑部右侍郎二十二年丁憂以事謫知曲靖府弘治
二年服闋改徽州府本年冬陞大理寺左少卿三年陞左副都
御史巡撫蘇松等府六年遷戶部侍郎八年改吏部右侍郎轉
左弘治十一年陞右都御史協閔珪理院事同奉 旨詳定條
例夙夜惟勤凡掌大獄俱從仁恕十三年陞戶部尚書詳戶部
戴珊字廷珍江西饒州府浮梁縣人天順甲申進士自幼端亮
有大志明性理之學務見於躬行成化二年擢四川道監察御
史廉慎公勤風紀截然 年奉 勅督南畿學校時士習頽靡
多緣飾詩書以獵聲稱珊正身率之凡考校必以文藝占器識
有請謁者遜不色拒而終亦無所撓羣士帖服無後言十四年

陞陝西按察司副使仍專學政如南畿又修古聖賢祠墓增秩
祀典德教風行在陝久待諸士如家人父子諸士亦愛慕不忘
稱誦至今久之陞浙江按察使秉公嚴正務崇大體一時僚貳
分巡各道者人異其見往往用已意出入於法瑯虛心比之多
所平反其禔身無眾寡無大小俱中矩矐識者稱其端鯁雅飾
不負軒公輒云踰二年進福建右布政使尋轉左自奉儉約無
他嗜好退居惟焚香讀書而已於義利軫限尤嚴靳不可渝故
終任不特閩中一物弘治二年郎陽撫治缺人太宰王端毅公
恕素重其賢薦陞右副都御史撫治其地特郎陽諸府豪右多
窟流聚爲利乃刻日令首罪民所闢田多匿稅略償所費而沒

其餘嚴練兵伍自製爲營陣法蜀盜野王剛嘯聚不逞初起夔州新寧往來東鄉大寧大昌諸邑肆行劫掠守土者莫能禁遂入湖廣竹山竹谿又據漢中金州平利西鄉諸郡縣凡五年守臣畏罪莫敢發珊請令四川湖陝三省調兵誅之 上下兵部議移檄三省撫臣調兵進討珊檄副使朱漢等分道並進賊聞風奔潰乃約川湖兵深入賊巢麻柳壩所向克捷於庚戌十一月誅其首惡縱其餘黨千餘人事遂定踰年辛亥召爲刑部右侍郎與尚書何文肅公喬新彭惠安公韶俱以學行負時望相與同心一德期敬獄以長我 國家於奏當之成務洗冤抑凡正人受禍者雖忤 旨不避若大奸宿猾盤據不可動者苟法

所難宥屢請弗已也一時稱爲得人久之轉左命勘荆府不法
事廷可其議九年遷南京刑部尚書留都私人奸法能訛是非
珊瑚慎三尺宜幽達滯皆犁然當人心又雅重鎮定足爲士類典
刑十三年召改左都御史掌院事益自檢律務持風紀雖簿書
之細必極精覈嘗與吏部考察京朝官者一考天下述職官者
再孝宗親鞠大獄諸司震悚珊瑚從容應對時有所開析天
威頓霽上知其清慎每廷奏宣面問至移晷刻引疾求退必
優詔勉留命醫賜食十八年己丑春召珊瑚同兵部劉公大夏入各
對畢上令中使出白金二錠以賜且面諭曰卿等將去買
茶果用朕聞朝覲日文官避嫌有閉戶不與人接見者如卿等

雖開門延客誰復以賄賂通也朕知卿等故有是賜且命不必
朝謝恐公卿知之未免各懷愧懼也後珊屢以老疾求退 孝
宗不允一日私懇於劉大夏曰珊老病子幼萬一客死異鄉地
下不瞑目也公同年好友也受知於 上獨不爲我一言乎一

日 上召劉大夏議事畢因問戴某近來何如劉言戴某有病
累疏乞休出於實情伏望 皇上憐而免之 上曰彼教卿來

乎劉曰戴某在告臣往視之彼恐微誠不能動天令臣見 陛
下日爲彼申達下情 上曰卿去說與戴某朕以天下事推誠

付托猶家人父子也太平未兆何忍捨朕而先歸乎劉以 上
語告珊泣曰吾不得返家矣未幾卒於官贈太子太保諡恭簡

瑯德性和粹中耿耿不苟合而洞達無城府奉職守法不爲物撓而意管近厚祿任四十餘年家無餘貲一意官守雖尊官高年猶削章牘辰入酉出窮寒暑不變厥歷中外所至有聲績學政尤著身既没人至今道之不衰爲時名臣云

王宗彝原名倫直隸保定府束鹿縣人初倫父文由本院左都御史入閣歷少保謹身殿大學士景泰癸酉倫同少保陳循子赴順天鄉試俱不中式文同循訐奏考官劉儼不公欲抵之罪於是阿附者得欽賜舉人天順元年罷革倫改名宗彝於成化乙酉應順天鄉薦丙戌中進士授戶部主事歷郎中十五年都御史陳越附太監汪直襲殺建州夷宗彝以督餉陞太僕寺

少卿未幾陞都察院右僉都御史十八年陳越被劾爲民宗彞
降四川左叅議弘治元年陞河南右叅政四年陞右布政會陝
西缺巡撫推右副都御史巡撫在陝無所建明歷兵部左右侍
郎十三年陞右都御史協理院事時左都戴珊以碩望在臺端
風紀整肅宗彞仰承休美無所抵牾十五年陞南京禮部尚書
詳南京禮部

史琳字天瑞浙江紹興府餘姚縣人成化丙戌舉進士丁亥授
工科給事中時責倖專擅一朝廷稍事宴游值上元張燈爲熬
山之觀費以數萬又頗崇飾浮屠官寺相望抗章歷論無所避
癸巳當道薦可大用遂以擢陝西布政司右叅議時鞏昌番賊

爲梗始至掩擊之盡降其衆遂出行部自安定歷會寧金蘭抵秦州相度地勢增繕屯堡斥埃以斷賊路旣又轉關中之粟以實甘涼身自輸督往來邊徼凡二年由是盡得其形勝要害及戰守方略戊戌以憂去任壬寅復起爲福建布政司右叅議奉勅督理銀課同官納賄將啓礦琳堅沮之民用弗擾甲辰轉江西布政司左叅政所部豪舉怙勢庇盜成習莫敢問悉鋤治之丙午袁吉饑極力賑濟全活者甚衆丁未春吉安民有殺其隣之子夤夜移置道傍被害之家莫知所由訴於琳緝之莫得乃禱於神曰境內平人被殺守土之責也願神告予以洗其寃是夜遂得之夢明日求之果得其人遂輸服已而贛盜起殺官吏攻

破城邑琳督捕斬七百餘人釋諸脇從遂以無事弘治戊申陞
右布政使辛亥轉左布政使民苦藩府歲祿至倍蓰取未歷
乃爲請於朝得自省轉輸自是遂免侵削琳既佐政久悉諸
諸利弊方銳意爲民興革尋擢都察院右副都御史巡撫保定
諸府兼提督紫荆諸關畿甸民困重役戊卒疲於罰班又滹沱
漲溢壞民田廬時爲三患乃爲定徭役法奏免重稅並河上流
穿文渠以殺水怒民賴以甦真定大名諸川果園皆居民世業
變律怙寵奏取以備供應琳力言其不可辭甚懇其略云此地
入之朝廷何啻毫毛而百姓實關軀命棄數千人之命以奉
一已陛下寧忍爲之窮民失業意外之虞尤難逆料詔遣

官覈視果如其言乃止久之有司議者真保定惜薪夫役屢疏
評尤力 詔仍其舊丙辰入爲工部右侍郎與尚書徐公貫膠
力曹務徐亦傾心比倚一時多所裁正嘗因災異上六事曰止
織造恤邊民停傳造惜供應節財用減無益皆切時宜庚申轉
左侍郎兼都察院左僉都御史經略邊關首陳謹邊關以防衝
突五事九載秋滿擢右都御史時虜寇猖獗 朝廷方命將出
師衆遂舉提督軍務已而報稍緩命先赴宣大會計兵馬芻糧
虜退還京 命涖院事卒入侍 經筵是歲虜復寇榆林假
琳軍法重權率偏師先往勸勵邊將琳乘機進戰屢有斬獲及
保國公朱聊統兵至遂協謀直搗虜巢虜聞風驚遁毀其虛帳

而還事聞 璽書褒美副以銀幣寶鑑師還入見陳邊務十三
事甲子復以西北多警 命與保國公治兵京管乙丑夏 敬
皇上賓國事槍攘而宣府遊兵復失利請濟師 上遽命出援
於是琳出宣府保國公出大同分督諸將合勢邀擊遂以捷奏
上降璽書獎勵師還入朝 遣中官迎勞 寵賜有加明年丙寅
爲正德改元正月卒先是一日火星犯左執法琳以爲已憂已
而左都御史戴公珊卒親朋以爲解琳曰未也及代掌院事不
踰月亦卒自居九卿前後請老十餘章 敬皇勉留不許至是
竟死於官年六十九計聞 上賜祭葬如例旣而司馬奏論戎
功贈太子少保左都御史尋復以大臣例加贈太子太保又

賜祭者再遣官喪喪以歸琳狀貌魁偉望之知其爲貴人童時溺園池中死彌日哇人出而負之復生聞者已占其不凡襟抱坦夷洞達與人不求備雖賤鄙劣見之皆獲自盡博聞多藝射奕書繪之事兵法地理推步占候與凡方藥之術咸識其要略尤工墨竹有求者無貴賤皆欣然應之天性孝友執親之喪哀毀踰節廬於墓側者三年家素儉約清介如寒士而闕恤親黨則不遺餘力居常規模古人爲自警要語列之左右二屏又以西山清慎公勤四銘刻爲一圖中揭心字題曰若不如此便不成人其戒子孫則曰昔先公省巷府君作宦三十餘年三掌教鐸四典文衡其所遺惟書數卷而已予竊祿明時惟恐橫叨

青紫常俸所入足供朝夕不使家有贏貲以汙先德惟願爲吾子若孫者不墜箕裘永守子訓使後世稱爲清白吏子孫吾願足矣故琳雖歷官中外四十餘年而卒無餘蓄聞者莫不歎服張敷華字公實江西吉安府安福縣人父洪爲監察御史預土木之難景泰初以死事蔭爲國子生少負氣節七歲時里社有竹木之祟乃指揮羣兒斬伐殆盡識者知其不凡旣受蔭入太學益淬礪問學有經世之志於天順壬午中應天鄉試甲申取進士改庶吉士大學士李文達公賢彭文憲公時皆重之欲留官翰林敷華與劉東山公大夏力辭不就成化改元乙酉俱授兵部主事敷華在車駕郎中留心問牧及講究九邊險易兵將

強弱以自考鏡歷員外郎進郎中公廉執法不肯少有所跛倚
事干時貴或欲軒輕之憫憫不輒撓又以抗法連忤中璫或令
遷者据撫亦竟無所得而罷時敷華隱然負公輔望十一年擠
出爲浙江叅議監溫處二府銀課景寧有礦盜聚至數千人鎮
巡官議進兵敷華曰此可撫而定也乃刻日使自歸身往泄之
賊露刃以待及諦視曰果我叅公也皆駢首聽命遂執其首惡
十二人餘悉宥之則又廣恩信以柔其不可爲異之心自是賢
聲著兩浙終爲忌者尼之久羈不遷十年以秩滿進浙江右叅
政益孜孜民隱清賦平徭養老長孤每行部進諸生誨之修身
進業之道士民躍然懷服未幾陞浙江右布政使屢斷疑獄又

令里甲不足遞相繼補民用稍舒弘治元年轉湖廣左轄浙人
追思遮道不忍其去雖在浙久之不受人一介人亦不輕以一
介潤之至楚歲大饑給粟散粥藥病埋死增價致買遣使告糴
因修學宮以備直資饑者所活不可勝計四年進都察院右副
都御史巡撫山西民不忍釋如浙人道聞母喪六年服闋仍舊
任歲復歉奏暫增解池鹽課以補王府歲祿會霖雨躬禱於神
池獨不壞歲給大同邊餉多用折納乃請太原以北可通車者
運米民亦便之未幾改撫陝西禁婚娶論財喪葬不得舉樂有
妖僧據山爲逆羣議洶洶兵部尚書馬公文升曰張公實在必
有處分此報至則公已受計令父老生縛之矣九年改南京兵

部右侍郎十二年陞都察院右都御史總督漕運首黜武臣部
運尤無良者權貴干請悉拒弗納近例漕司多假太倉官銀少
免利息敷華謂逋負乃下剝上攘所致而官爲借貸大非政體
峻爲之禁高郵諸湖隄久且壞乃爲深溝數道以緩湖水寶應
地多平陸又趣令築隄隄成而水行至又奏准江西南兌糧二
十五萬石折銀每石六錢又因久雨奏改京倉糧五十萬石於
通倉收又因運河爭競奏准造船與王府官校船兩岸分十四
年改南京都察院右都御史掌院事振揚風紀鈐束各道無緣
法爲市務崇大體慎廉隅又介特蘄然不輕言笑與林公瀚林
公俊章公懋一時稱爲南都四君子十八年進南京刑部尚書

尋以人望召改左都御史掌院事至則正身肅度表率百僚請
嚴天下有司貪酷奔競之禁會獄重獄有寵臣坐法或疑當未
減力執不可卒從重議正德改元有旨令致仕卽日上道歸後
逆瑾又矯詔指敷華與大學士劉公健謝公遷尚書劉公大夏
韓公文林公瀚等爲朋黨頒示天下逾年卒於家瑾誅贈太子
少保謚簡肅敷華風采凝重辨義利若黑白事有不可曲爲遷
就進退得失未嘗一動其心遺命所屬猶謂不以悖貨爲子孫
累益至死不亂也哉識者稱敷華與林公瀚韓公文爲弘治人
君子云

方州集云世嘗疑清望之士不樂任錢穀公兩司財賦事皆優

瞻而冰蘖之節可通神明溫雅不隨果介不刻愛憎喜怒不加之意端慮慎動凝然靜密而貪殘矯偽者自革蓋其廉能公斷根於性本發於心源賁之以文章學問故抱負設施粹焉不見其跡自可久而不變所謂大受之器云

屠勳字元勳浙江嘉興府平湖縣人成化乙丑進士授工部主事累官大理寺左少卿弘治甲寅陞都察院右副都御史巡撫順天等處以近畿役重民貧京邑尤甚疏請裁省夫役停昌平牧馬以示優恤疏戒約取寶坻銀魚者疏止麻峪山有銀礦守臣以中旨索之又上疏極言其不可事止不行其經略邊備奏分薊州三路屯兵緩急相援於潮河川築十城設險居守及

增置黃花鎮營堡戍兵聲勢聯絡虜不敢輕犯至今賴焉又奏
徙熊兒峪馬營於便地就水泉人免病暍豬圈頭關沮洳多水
患歲苦修築亦奏徙之南北水峪歲省役卒數百人丁巳遷刑
部右侍郎轉左丁憂十六年服闋補都察院左副都御史理院
事十七年復改刑部左侍郎十八年陞右都御史理院事武
宗嗣位首上 郊祀籍田幸學三事援據經傳以時事而歸
其本於正心講學謂初服新政莫急於此宜求實意勿徒循故
事爲美觀又以宋儒真西山大學衍義爲正心講學之要乞常
以進講中外傳誦之正德二年陞刑部尚書詳刑部

劉宇字志大河南開封府鈞州人成化壬辰進士授上海知縣

累官右副都御史巡撫大同宇心術不端有巧才善結奄豎正德二年逆瑾勢傾中外宇附大學士焦芳結瑾入爲左都御史掌院事在臺未逾二月無所表正以附逆瑾改兵部尚書歷吏部尚書詳內閣

張憲字廷式江西饒州府德興縣人成化壬辰進士授吏部考功司主事累官工部右侍郎弘治十八年命兼都察院右僉都御史整理兩浙八閩鹽法親歷諸場炎瘴無所避適三品九年考滿陞右都御史仍督其事事將就緒正德二年賊瑾專政議屠瀟理院事時瑾入司禮監武宗悉以章奏付瑾剖斷不送內閣稟旨瑾於私宅檢取稟旨奏聞專用松江人張文冕者紀

錄騰寫府部等衙門稟公事填門自科道部屬以下皆行跪禮
都察院一日奏審錄重囚事內寫劉瑾傳奉字樣重複數多瑾
大怒罵之憲同左都屠瀟率十三道御史謝罪御史跪塔下瑾
數其罪斥責皆叩頭不敢仰視憲與瀟隱忍受之亦不敢出一
語未幾瀟致仕憲調南院後歷南京禮工二部尚書詳南京工
部

陳金字汝礪湖廣德安府應城縣人成化壬辰進士授婺源知
縣十五年遷南京山西道監察御史二十一年守制弘治元年
一補江西道監察御史四年陞山西副使九年陞貴州按察使十
一年調雲南按察使十一年陞雲南左布政使十三年陞都察院

右副都御史巡撫雲南地方十七年陞南京戶部右侍郎正德
元年陞都察院右都御史總制兩廣軍務兼理巡撫二年討平
柳慶徭寇三年轉本院左都御史仍舊總制江浙閩廣等處軍
務有幹才平桃源華林諸寨請建萬平縣治七年加太子少保
本年終養十年起原職加太子太保總制兩廣軍務兼理巡撫
先是府江賊村巢接壤劫殺爲患至是調兵勦平之及平流賊
龔全福十二年加少保兼太子太保左都御史同王景掌院事
時璟以左都綸以右都俱掌院金質緣再進又以少保坐院中
故時人有中都御史之誚十六年五月致仕

洪鍾字宣之洪氏世顯於鄱陽自宋太師忠宣公皓始賜第於

錢塘西湖之葛嶺遂爲錢塘人祖有恒初名洪武昌忌者上書言其名犯年號高皇帝親錄之曰此朕興之兆耳御筆在恒易之鍾自幼岐嶷不凡成化戊子年二十六以易經領鄉薦乙未舉進士授官刑部主事諳習憲典大司寇林聰器重禮信之委總諸司章奏擬議大獄取裁於鍾聲聞驟起庚子陞員外郎仍領諸司事癸卯丁內艱丙午起復陞郎中尋慮囚山西丁未江西福建流賊甫定承命往審處之歸言福建之武平上杭清流永定江西之安遠龍南廣東之程鄉皆流移混雜習於鬪爭以武力相尚是以易闕而亂譬若羣豺虎而激怒之欲其無相擾噬難矣宜及其平時令有司多立社學以訓誨其子弟

減防秋官兵六千人歲省輓輸犒賞之費以數萬創建浮橋於
通州以利病涉毀永平陶窯以息軍民橫役之苦奪民產及牧
圍草場之入於權貴者而悉還之遠近大悅名稱籍甚然權貴
人之扼勢失利者數短於上遂改雲南巡撫再改貴州頃之

召還督理漕運兼巡撫鳳陽諸處正德丁卯陞右都御史仍董漕

政戊辰命掌南京都察院事尋陞南京刑部尚書己巳正月

改北京工部四月復改刑部閏九月以刑部尚書改兼都察院

左都御史掌院事加太子少保賜玉帶庚午正月特命出

總川陝湖廣河南四省軍務時沔陽洞庭水寇丘仁楊清等攻

掠城邑其鋒甚銳官軍屢失利鍾至以計擒滅之六年五月時

川賊藍廷瑞與鄆本恕等聚眾往來寇暴川陝間遠近騷動勅
鍾同巡撫林俊勦捕鍾涉歷險阻深入賊巢運謀設奇躬冒矢
石前後斬獲招降以十數萬擒其渠酋二十八人露布以聞六
月加鍾太子少保 賜玉帶土官楊友楊愛相仇激爲變眾至
三萬餘流劫重慶保寧諸州縣隨調兵剿平之復其故業 朝
廷七降勅獎勵 賜白金麒麟服進太子太保因被劾乞歸

賜馳驛還鄉仍進榮祿大夫錄其孫一人入胄監旣歸築兩峯書
院於西湖之上自號兩峯居士日與朋舊徜徉詩酒以爲樂如
是者十有一年嘉靖改元壬午 詔進階特進光祿大夫柱國
賜玄纁羊酒遣有司勞問尋卒於家謚襄惠

李士實字若虛江西南昌府豐城縣人新建籍成化丙戌進士授刑部司主事陞司員外郎年陞司郎中

年陞浙江副使提督學校二十三年調廣東巡海副使弘治六年陞廣東按察使九年陞山東右布政使本年陞山東左布政使十一年陞都察院右副都御史巡撫雲南地方十三年陞刑部右侍郎十七年致仕正德六年起陞都察院右都御史撫治鄖陽等處地方本年召還本院掌院事尋致仕以附逆濠伏誅

林俊字待用福建興化府莆田縣人成化戊戌進士正德六年由四川巡撫右副都御史以擒藍廷瑞鄆本恕功加本院右都

御史未任尋致仕後歷刑部尚書詳刑部

國朝列卿紀卷之七十二終